

四庫全書

史部

欽定四庫全書

史部

山東通志卷十一

詳校官監察御史臣劉湄

檢討臣德生覆勘

總校官知縣臣繆琪

校對官編修臣盧遂

騰錄監生臣沈一諤

欽定四庫全書

山東通志卷十之一

巡狩志

岱宗古帝王巡行之所有事也我

聖祖仁皇帝六飛首馭愷澤旁流考度修禋一本於虞周
之精意今

皇上恪承

令典垂憲萬年而玉牒金繩屏置不講一作一述復乎弗

可及已舊志疎蕪闕焉未補懼無以表東方之盛
蹟宣

昭代之宏規用是輯而增之易之省方詩之時邁禮之
升中於天儀制具載乃復於封禪詳著之者七十
二君之說蓋經傳未之前聞謹無稽所以崇有則
也作巡狩志

巡狩志上

歷代巡狩
國朝盛典

歷代巡狩

唐虞天子五載一巡狩歲二月東巡狩至於岱宗柴
望秩於山川羣后四朝肆覲東后協時月正日同律
度量衡修五禮五玉三帛二生一死贄五月巡狩至
南嶽八月巡狩至西嶽十一月巡狩至北嶽皆如岱
宗之禮歸格於藝祖用特

夏后氏因之

周制十二年一巡狩天子將巡狩類乎上帝宜乎社
造乎禰職方氏先戒四方諸侯曰各修平乃守考乃

職事敢不敬戒國有大刑及王之所行先道帥其屬

而巡戒令太馭掌犯較之禮

謂祖道

土訓氏夾王車而

行以待王問九州形勢

所謂以道地圖

山川所宜

所謂以誦詔地事誦

訓氏亦夾王車以上古久遠之事以告王

誦訓所謂掌道方志

以詔觀事若魯有大庭氏之庫散之二陵也

又掌道方慝

方慝言語所惡以詔

辟忌以知地俗乘金輅建大旂歲二月東巡狩至於

岱宗柴而望祀山川覲諸侯其方之諸侯先於境首

待之所過山川則使祝宗先以三等璋瓚皆以黃金

為鼻流酌鬱鬯以禮神次乃校人殺黃駒以祭之每
宿舍掌舍設榼栳再重其外則土方氏又設蕃籬既
至方岳先問百年就見之若未滿百年八十九十者
路經其門則見之不然則否天子乃令太師採人歌
謠賦詩以樂播而陳之以觀人風俗以審其善惡命
典市納賈陳百物之貴賤以觀人之所好惡又命典
禮之官考校四時節炁月之晦朔甲乙等日及候氣
之律呂所用禮樂宮室車旗等制度君臣上下之衣

服皆以王者所頒制度考校之諸侯封內有名山大川不舉而祭之者為不敬不敬者君削其地有祭宗廟不順昭穆者為不孝不孝者君絀以爵變禮易樂者為不從不從者君流革制度衣服者為畔畔者君討有功德於人者加地進律其諸侯待王之牢禮以一犢既黜陟諸侯乃與之相見於方岳之下築壇與觀禮壇其壇外為土埒方三百步開四門壇方九十六尺高四尺上為堂下為三等謂之三成成每等高

一尺其堂置司盟之神位謂之方明

方明者上下四方神明之象也

見諸侯之時據鄭註司儀及覲禮諸侯之上介各以其君之旗置於宮內以表立位之處乃詔三升壇訖諸侯皆就其旗而立其位鄭按明堂位諸公中階之前北面東上諸侯阼階之東西面北上諸伯西階之西東面北上諸子門東北面西上諸男門西北面東上王乃於壇上揖之以定其位其揖之節有三儀與王無親者推手小下之與王婚姻之親者平推手揖

之與王同姓者推手小舉之王既揖定其位諸侯乃進升壇奠玉又按司儀職及鄭注云公於上等奠桓圭王陳擯者五人禮之侯伯於中等奠信珪躬珪王陳擯者四人禮之子男於下等奠穀璧蒲璧玉陳擯者三人禮之諸侯各奠玉訖降拜又升成拜訖擯者乃延諸侯升堂授王玉訖乃以璧琮行享禮謂之將幣諸侯既朝見王訖乃退而自相與盟王宮之伯臨之其神主於月必因以祭之其餘五月南巡狩至於

南岳如東巡狩之禮八月西巡狩至於西岳如南巡狩之禮十有一月北巡狩至於北岳如西巡狩之禮巡狩訖却歸每廟用一牛以告至謂之歸格於祖禰用特

漢光武建武三十年春二月東巡狩幸魯祭泰山及梁父漢章帝元和二年二月東巡狩至泰山道使使者奉一太牢祠帝堯於濟陰成陽靈臺上至泰山修光武山南壇兆辛未柴祭天地羣神如故事壬申宗

祀五帝於汶上明堂武帝配癸酉更告祠高祖太宗
世宗中宗世祖顯宗於明堂各一太牢卒事遂觀東
后饗賜王侯羣臣因行郡國幸魯祠孔子及七十二
弟子四月還東都庚申告至祠高廟世祖各一特牛
詔曰朕巡狩岱宗柴望山川告祠明堂以章先勲
其二王之後先師之裔東后蕃衛伯父伯兄仲叔季
弟幼子童孫百僚從臣宗室衆子要荒四裔沙漠之
北蔥嶺之西冒彫之類跋涉懸度陵踐阻絕駿奔郊

時咸來助祭祖宗功德延及朕躬予一人空虛多疚
慕承尊明盥洗享薦慙愧祇慄詩不云乎君子如祉
亂庶遄已歷數既從靈耀著明亦欲士大夫同心自
新其大赦天下諸犯罪不當得赦者皆除之復博奉
高麗無出今年田租芻橐又告平原東平等郡太
守相曰朕惟巡狩之制以宣聲教考同遐邇解釋結
冤也今四國無政不用其良駕言出遊欲親知其劇
易前祀園陵遂望祀華霍東柴岱宗為人祈福今將

禮常山遂徂北土歷魏郡經平原升踐隄防詢訪耆
老咸曰往者汴門未作深者成淵淺則泥塗追惟先
帝勤人之德底績遠圖復禹弘業聖績滂流至於海
表不克堂構朕甚慙焉月令孟春善相丘陵土地所
宜肥田尚多未有墾闢其悉以賦貧民給與糧種務
盡力農勿令遊手所過縣邑聽半入今年田租以勸
民夫之勞安帝延光三年二月丙子東巡狩辛卯幸
泰山柴告岱宗壬辰宗祀五帝於汶上明堂癸巳告

祀二祖六宗勞賜郡縣隋文帝開皇十四年冬十二

月乙未東巡狩十五年春正月壬戌車駕次齊州親

問疾苦丙寅旅玉符山庚午上以歲旱祠泰山以謝

愆咎大赦天下

隋志帝行幸兗州遂次岱岳為壇泰山下設祭如南郊又壇外為柴壇飾

神廟展宮懸於庭為埋瑄二於南門外又陳樂設位於青帝壇如南郊帝服袞冕乘金輅備法駕而行禮

畢遂詣青帝壇而祭焉又隋制行幸所過名山大川則有司致祭岳瀆以太牢山川以少牢巡狩則類上

帝宜社造廟還禮亦如之將發軔則輟祭其禮有司於國門外委土為山象設埋瑄有司剗羊陳俎豆駕

將至委奠幣薦脯醢加羊於軾西首又奠酒解羊并饌埋於瑄駕至太僕祭兩軾及軾前乃飲授爵遂轅

輶
上

唐開元禮巡狩儀

鑾駕出宮

將巡狩所司承制先頒告於東方諸州曰皇帝二月
東巡狩各修平乃守考乃職事敢不敬戒國有常刑
駕將發告園丘宗廟社稷皆如別儀皇帝出宮大備
鹵簿皆如常儀輶于國門祭所過山川如親徵之禮
所經州縣刺史縣令先待於境通事舍人承制問百

年古先帝王名臣烈士皆州縣致祭

燔柴告至

將告將作先於大山下修圜壇四出陛前告三日尚

舍直長施大次於外壝東門之內

其設文武侍臣次陳饌位

設宮

懸樂燎壇之制

一如園丘之儀

前一日皇帝清齋於行宮應

告之官皆於告所清齋一日近侍之官應後升者及

從告羣官諸方客使皆於其所俱清齋一宿諸衛令

其屬晡後一刻各以其方器服守衛壝門盟太樂工

人俱清齋一宿奉禮設御位於壇之東南西向設告
官司徒執事者御史奉禮贊者協律郎太樂令望燎
位東方諸州刺史縣令介公鄴公文武九品以上官
西方北方蕃客等位並如上幸園丘儀

其褒聖侯等亦如之設

告官以下門外位於東西壝門之外道南皆如設次
式郊社令帥府史一人及齋郎以罇坩壘洗篚纂入
設於位並如常儀執罇壘篚纂者各位於罇壘篚纂
之後告日未明十五刻太官令帥宰人烹牲於厨未

明四刻太史令郊社令各服其服升設昊天上帝神座於壇上北方南向席以藁秸設高祖神堯皇帝神座於東方西向席以莞設神位各於座首未明三刻諸告官以下各服其服郊社令良醢令各帥其屬入實罇壘及玉太祝以玉帛置於篚太官令帥進饌者實諸籩豆簠簋等皆設於饌幔內未明二刻奉禮帥贊者先入就位贊引引御史太祝以下入行掃除如常儀訖各就位皇帝服袞冕乘輅行宮奏請進發內

外器服如常儀駕將至謁者贊引各引告官通事舍
人引從告羣官東方刺史縣令諸方客使俱就門外
位駕至大次門外迴輅南向初皇帝既升奠玉幣太
官令帥進饌者諸太祝迎引於壇上各設於神座前
設訖謁者引司徒以下降自東陛復位諸太祝各還
罇所太常卿引皇帝詣壘洗樂止訖興皇帝再拜初
讀祝文訖樂作太祝進奠板於神座還罇所皇帝拜
訖樂止太常卿引皇帝進天帝神座前北向立樂作

太祝各以爵酌福酒謁者引司徒降復位太祝各進
徹豆還罇所奉禮曰賜昨

鑾駕還行宮

皇帝既還大次侍中版奏請解嚴皇帝改服通天冠
絳紗袍乘輅奏請還宮如常儀

望秩於山川

柴之明日望秩祀於嶽鎮海瀆山川林澤丘陵墳衍
原隰將祭所司先為壇於祭所其神皆以尊卑為敘

重行南向前三日守官設祭官以下次於東墻之外
道南北向以西為上設陳饌幔於內墻東門之外道
北南向前二日太樂令設宮懸之樂於壇南設登歌
於壇上皆如常儀右校掃除壇內外又為瘞瘠於壇
北之壬地外墻之內方深取足容物前一日諸祭官
清齋於祭所諸衛令其屬晡後一刻各以其方器服
守衛墻門與太樂工人俱清齋一宿奉禮設祭官位
於內墻東門之內道北執事位於道南俱西向北上

設御史位於壇下一位於東南西向一位於西南東
向令史各陪其後設奉禮位於樂懸東北贊者二人
在南差退俱西向協律郎位於壇上在西陛之西東
向設太樂令位於北懸之間設望瘞位於瘞堦之東
西向設祭官以下門外位於外壝東門之外道南每
等異位北向西上設酒罇之位岳鎮海瀆各山壘二
山川林澤俱蜃罇二丘陵墳衍原隰俱散罇二各於
壇上南陛之東北向西上

其岳靈上加山壘二壘置
於山罇東北向皆加白罍

設玉篚於罇坫之所設洗於壇南陞東南如常執罇
壘篚累各位於罇壘篚累之後郊社令帥齋郎以罇
坫壘洗篚累入設於位祭日未明十五刻太官令帥
宰人以鑿刀割牲齋郎以豆取牲血置於饌所遂烹
牲未明二刻太史令郊社令各服其服入設神座各
於壇上北方南向席皆以莞設神位各於座首未明
一刻祭官以下各服其服郊社令良醢令入實罇壘
及玉太祝以幣置於篚太官令帥進饌者實諸籩豆

簋簠等奉禮帥贊者先入就位贊引引御史太祝與執罇壘篚畧者入自東門當壇南重行北向西上立定奉禮曰再拜贊者承傳御史以下皆再拜訖執罇壘篚畧者各就位贊引引御史詣壇東陞升行掃除於上令史祝史行掃除於下訖引就位質明謁者引獻官贊引引執事者俱就東門外位太樂令帥工人次入就位謁者贊引各引獻官以下入就位立定奉禮曰再拜在位者皆再拜謁者進獻官之左白有司

謹具請行事退復位協律郎跪俛伏舉麾鼓祝奏順

和之樂以蕤賓之均

自後壇下之樂皆奏姑洗

樂三成偃麾戛敔

樂止奉禮曰再拜獻官以下皆再拜太祝取玉於篚

立於罇所謁者引獻官詣岳壇升自南陛北向太祝

以玉幣東向授獻官受登歌作肅和之樂以函鍾之

均謁者引獻官進北面跪奠於岳神之座俯伏興謁

者引退北面再拜訖登歌止謁者引獻官降自南陛

還本位初獻官升奠玉幣太官令帥進饌者奉饌陳

於東門外登歌止太官令引饌入俎初入門雍和之
樂作饌至陞樂止饌升南陞太祝迎引於壇上設於
神座前設訖太官令以下降自東陞以出太祝還罇
所其鎮海以下之饌皆祝史迎於壇上設於神座前
相次而畢訖謁者引獻官詣罍洗盥手洗爵訖謁者
引升自南陞詣酒罇所執罇者舉罍獻官酌醴齊訖
樂作謁者引詣岳神座北向跪奠爵興謁者引獻官
少退北向立樂止初獻官進奠爵祝史各以爵奠鎮

海以下還罇所太祝持版於神座之右東面跪讀祝文訖興獻官再拜初讀祝文訖樂作太祝進奠版於神座還罇所獻官拜訖樂止太祝酌壘福酒進獻官之右西面立獻官再拜受爵跪祭酒啐酒奠爵興太祝帥齋郎進俎太祝減神前三牲胙肉加於俎西向授獻官受以授齋郎獻官跪取爵遂飲卒爵太祝受爵復於坵獻官興再拜謁者引獻官降復位諸祝各徹豆如常訖還罇所奉禮曰賜胙贊者唱再拜在位

者皆再拜

獻官不拜

順和之樂作奉禮又曰再拜獻官以

下皆再拜樂一成止謁者進獻官之左白請就望瘞
位西向立於衆官將拜諸太祝外執篚進神座前跪
取玉幣齋郎以俎載毛血等各由其陞降壇詣瘞瘞
以物置於壇訖奉禮白瘞瘞東西各四人實土半瘞
謁者進獻官之左白禮畢遂引出贊引引執事者以
次出又贊引引御史太祝以下俱復執事位奉禮曰
再拜御史以下皆再拜訖出贊引引工人以次出其

祝版燔於齋所

肆覲東后

望秩之明日肆覲東后於告至之前刺史縣令皆先
奉見如常將作先於行宮之南為壇宮方三百步面
一門為壇於壇內三分壇二在南壇方九丈六尺高
四尺四出陛前二日太樂令設宮懸之樂於壇南如
殿庭之儀前一日尚舍鋪御座於壇上近北南向又
設解劔席於南陛之西南守宮於門外量設百官次

文東武西以北為上東方刺史縣令次於文官之南
蕃客次於武官之南所司陳路於壇南如常典儀設
羣官板位文官一品以下九品以上位於壇東南每
等異位重行西面以北為上武官一品以下九品以
上位於壇西南當文官每等異位重行東面以北為
上東方刺史縣令於壇南三分庭一在南每等異位
重行北面以西為上若有蕃客則位於刺史之西每
國異位重行北面以東為上設典儀位於南陛之東

贊者二人在南差退俱西南北上奉禮設門外位文
官一品以下九品以上位於門東每等異位重行西
面武官一品以下九品以上位於門西每等異位重
行東面俱以北為上設陳方刺史縣令位於文官之
南每等異位重行西面以北為上蕃客位於武官之
南每國異位重行東面以北為上其日未明三刻諸
位各以其方器服量設牙旗於墻外四面未明一刻
諸位各勒所部列黃麾大仗屯門及鉞戟陳於墻內

如殿庭之儀羣官及刺史以下集各就次服其朝服
蕃客集次各服其服侍中版奏請中嚴近使陳於行
宮門外諸侍衛之官各服其器服符寶郎奉寶俱詣
行宮門外奉迎典儀帥贊者先入就位吏部兵部主
客戶部及羣官客使俱出次通事舍人各引就門外
位刺史縣令俱執贊通事舍人引就門外位贊各以其土所
有錦綺繒布葛布之屬具五其餘當土常貢之物並
兩為一束而執之仍飾以黃幅
盛以篚其屬執之列於縣令位後通事舍人引文一

品以下九品以上先入就位侍中版奏外辨皇帝將
出仗儀太樂令令撞黃鍾之鍾左右五鍾皆應協律
郎舉麾工鼓祝奏太和之樂皇帝服袞冕乘輿以出
曲直華蓋警蹕侍衛如常儀皇帝入自北墻門由北
陛陞壇即御座樂止乘輿退其羽儀華蓋仍侍於御
側通事舍人引東方刺史以下入就位鴻臚引蕃客
次入就位初刺史入墻門懸下舉麾舒和之樂作至
位立定樂止典儀曰再拜贊者承傳執贊者俱跪奠贊

興在位者皆再拜訖跪取贄興

凡拜奠贄皆如之

侍中前承

制降詣刺史東北西面立稱有制蕃客則客人承旨

宣勅刺史以下皆再拜宣制訖又再拜戶部引諸州

貢物兩行各入於刺史位前東西陳之龜為前列金

次之丹漆絲纊四海九州美物重行量陳於後訖執

物者各退立於東西廂文武前側立通事舍人引刺

史為首者一人執贄詣解劔席解劔脫舄執贄興舍

人接引升壇詣御座前北面跪奏稱具官臣某姓名

等敢獻壤奠遂奠贄俯伏興又舍人跪奉以東授所
司舍人引刺史降詣解劔席跪佩劔納舄興通事舍
人引復北面位初為首者奠贄通事舍人引在庭者
以次奠贄於位前訖各俯伏興引退復位訖刺史以
下俱再拜戶部尚書進詣階門北面跪奏稱戶部尚
書臣某言諸州貢物請付所司俯伏興侍中前承詔
退稱制曰可尚書退復位所司受贄其執貢物各進
執物所司引退俱出東門初刺史將朝中書侍郎以

諸州鎮表方別為一案候於西門外給事中以祥瑞
案候於東門外俱令史絳公服對舉案侍郎給事中
俱就侍臣班初刺史將入門中書侍郎降引表案
入詣西陛下東面立給事中降引祥瑞案詣東階
下西面立刺史將升奠中書令黃門侍郎俱降立
於階下刺史執贄升陛中書令黃門侍郎各執所
奏之文以次升初戶部尚書令退復位訖中書令
前跪奏諸方表記黃門侍郎又進跪奏祥瑞各還

侍位侍郎與給事中引案退司儀曰再拜贊者承傳
文武羣官刺史以下及諸國客俱再拜訖通事舍人
以次引北面位者出就門外位侍中前奏稱侍中臣
某言禮畢俯伏興還侍位皇帝興太樂令令撞蕤賓
之鐘左右鐘皆應太和之樂作皇帝乘輿降自北陛
警蹕侍衛如來儀入行宮樂止通事舍人引東西面
位者以次出設會如元會之儀

考制度

朝覲之明日左右丞相以考制度事奏聞命太常卿採詩陳之以觀百姓之風俗命市納賈以觀百姓之所好惡命典禮考時月定日同律觀禮樂制度衣服正之山川神祇有不舉者為不敬宗廟有不順者為不孝不孝不敬者則長官黜以爵革制度衣服者為叛叛者長官有討有功德於百姓者加爵賞五月南巡狩至於南岳如東巡狩之禮八月西巡狩至於西岳如南巡狩之禮十有一月北巡狩至於北岳如西

巡狩之禮歸格於宗禰用特如別禮若告封禪如別儀

時巡秩祀

尚書東巡狩至於岱宗柴望秩於山川

東岳諸侯境內名山大川

如其秩次望祭之

禮天子祭天下名山大川五岳視三公四

瀆視諸侯

五嶽視三公謂其牲幣粢盛豆爵獻之數比之三公也周禮云上公饗餼九牢殮五

牢饗禮九獻豆四十是也按晉何琦論曰唐虞之制天子五載一巡狩順時之方柴燎五嶽望於山川徧於羣神故曰因名山升中於天所以昭告神祇饗報功德是以災厲不作而風雨寒暑以時降及三代年

數雖殊而其禮不易五岳視三公四瀆視諸侯著在經記所謂有其舉之莫敢廢也

宋真宗大中祥符元年封禪禮畢詔加號泰山天齊王為天齊仁聖王 五年加上曰天齊仁聖帝命學士晁迥撰天齊仁聖帝碑銘其辭曰臣聞結萃為山麗無疆之厚載升名曰嶽表奠服之崇丘至若根一氣以混成婉四時而首出作鎮東夏寔惟岱宗辨乎五方設位冠配天之大畫為八卦建標當出震之區邃深連空洞之宮翕習號神靈之府夫其魁甲艮象

握制坤軸巖嶙磳礧穹崇宕崑天門路界於鬱蒼日
觀勢臨於杲曜列仙遯迹存棲真之石間永命儲休
閔與齡之金篋滋殖百卉函育庶類畜泄雷雨吐納
風雲封之所以合元符登之所以小天下近綴梁社
遠矚秦吳控壓海沂襟帶洙泗鄒人所仰魯邦是詹
肇生物之化權蓋順貞之壽域也古先哲后誕膺駿
命披皇圖稽帝文告成功申大報昭姓考瑞刻石紀
號自無懷氏迄唐明皇登封展采布在方冊者罔不

於茲矣開元十三年始封神曰天齊王禮秩加三公
一等綿歷五代寂寥無聞爰暨皇朝勃興嘉運叶百
姓與能之望應真人革命之秋太祖皇帝總擘英雄
鞭撻宇宙勤勞四征削平多壘方混一於寰中太宗
皇帝纂隆洪緒懋建皇極斟酌道德統和天人乃綏
懷於海外然而艱難創業緼畜貽謀勒崇奮炎將底
績而未暇開先遺大知奕世而有歸粵惟崇文廣武
感天尊道應真佑德欽明上聖仁孝皇帝陛下承鼎

足之基格孟安之世顯仁以育物廣孝以奉先宣洽
重熙財成庶政弭戎息旅撫柔要荒乘國步之密清
宅天衷於醴粹因之以豐懋加之以康阜席慶宗廟
之重游心帝王之術長轡遠御大道坦夷天衢於是
嘉亨德教於是乎漸被戴日戴斗聿遵朝聘之期太
平太蒙盡入車書之域垂衣在上擊壤在下得以疇
咨俊茂博訪幽隱講求典禮包舉藝文接千歲之統
可炳儀於封祀當萬物之盛宜昭告於神明然猶務

謙尊而益光體健行而不息冲晦藏用淵默思道俄
而天休震動上帝顧懷真籙存臻靈心有懌總集峻
命覺悟烝黎踰金簡玉字之文等河圖洛書之寶承
是秘檢發為蕃釐霈澤開榮普天受賜新建元之號
易通邑之名茂昭降祥聳動羣聽是時東土耆老湊
闕廷以上書南司宰輔率官師以抗表願循考古之
道煥發升中之儀弗獲固辭乃徇勤請且以增覆載
之高厚揚祖宗之純懿也儲峙供億悉出於縣官經

啟營繕不煩於民力大中祥符元年冬十月具儀制
嚴仗衛陳屬御隣介丘齋心服形奉符行事羣司奔
走百禮修明集嶢巖之巔凌顥英之氣壇壝清肅牲
器純備玉幣式敘樽彝在列奠獻克謹皦繹用張晏
娛交三神之歡陟配崇二聖之位舉燿火升高烟示
瑤牘以環觀建雲臺而特起社首之禮抑又次焉咸
秩無文奉行故事朝會赦宥涵濡溢滌采興誦求民
瘼旌前烈衍徽章參用王制著明皇績大猷克集神

實幽贊故自始及末見象日昭史氏之筆殆不停綴
則有非烟紛郁太陽晏溫仙芝無根菌蠢以含秀醴
泉無源涖涌而善利靈輝休氣嘉穀奇木鱗介之宗
長翔游之品類表異駢出曠代絕倫豈非受職修貢
發祥介福之徵乎人謂是山崇冠羣嶽功侔造化斯
不誣矣國家稽虞書四巡之首原漢氏五祠之重述
宣邦典申嚴祭法奉正直聰明之德罄精虔嘉粟之
誠為民祈福與國均慶封畿之後復增懿號曰仁聖

天齊王蓋以形容靈造舉褒崇之禮也名稱之義大
矣哉化工生物之謂仁至神妙用之謂聖登隆顯赫
亦云至矣復思嚴飾廟貌彰灼威靈責大匠之職議
惟新之制於是命使屬役協辰僝工庀卒徒給財用
興雲鍾運風斤程工物以致期分國工而騁藝規
畫盡妙樂勸忘勞踰年而成不愆於素棟宇加宏麗
之壯像設賁端莊之容凡所對越肅恭逾至四年春
舉汾陰后土之祀成天地合咎之禮憲章明備上下

交感純嘏既錫大賚施及圖首方足式歌且舞倚歟
間歲順動焜煌景鑠而皆擬聖明之述作從英茂以
飛騰灼敘慶靈奉揚殊貺紀諸盛節悉以命篇布日
星之華配雲雨之潤並刊鳳藻散時龜趺播洋溢之
頌聲垂極蟠之能事而志求象罔順拜崆峒闢衆妙
之門廣列真之宇非止卜永年于郊鄠是將納雅俗
於華胥者也又以太乙五佐本乎天太寧五鎮本乎
地其位參兩鴻名可齊特尊列嶽咸加帝號由是奉

升泰山之神曰天齊仁聖帝乃命案馳道之東偏直
宸居之巽位辟地經始別建五嶽帝宮以申崇尚之
禮焉御製奉神述詔中書召侍從之臣諭以制作之
本意觀夫聖文之梗概以為岱鎮之大輔於柔祇動
植之所蕃息原源之所滋液至靈允宅陰陽攸司鍾
戩穀而有徵繫黎元之是賴舊史具載前王式瞻著
冊封之典嚴祀祠之禮增奉邑之數申樵蘇之禁皆
以仰不測之明威顯無方之妙迹也方今兵革偃戢

華夷會同歲獲順成物無疵癘率由丕應冥助永圖
固當稽彼前聞進其尊稱謂乎唐虞曰帝商周曰王
夫商周之王爵人臣而有素唐虞之帝奉神道而何
疑況其容衛等威冠裳制度極徽數以宿備宜明艷
以相符因而成之禮無違者願延景祐普及含生至
乎哉聲動睿辭無私廣大坦然明白之理沛然利澤
之德曲成司牧俾臻富壽有以見聖人之情矣遂誌
勒石偏立於五嶽廟庭從近臣之議也是歲冬並命

使介分詣諸嶽定吉日飾有司皇帝被法服御朝元
殿禮行樂作而臨遣之持節受冊袞冕相繼次敘而
出觀者如堵且歎文物聲名之盛未嘗有也使者奉
詔訖事率叶素期於穆宏觀曩超千古矣越明年詔
五臣撰辭各建碑於嶽廟而臣浸漬皇澤涵泳清徽
偶集鳬鴈之行遂塵龍鳳之署預承綸旨強叩蕪音
曷勝眷獎上以慶幸宣明盛禮叨奉冊於秦城潤色
貞珉玷彌文於魯嶽荷輝榮之稠疊愧才學之空虛

燥吻濡毫謹為銘曰節彼泰山蟠巨大東一氣凝神
五嶽推雄勢並鳧嶧秀出龜蒙崛起海表目為天中
高摩霄極俯瞰暘谷神策斯秘昌圖可卜物性鍾仁
民居獲福魯邦是常盛德在木百靈淵府三宮洞天
稷丘真隱芝童列仙白鶴方駕飛龍命篇宅其勝境
幾乎大年嶽長曰宗歲交曰岱仰止巉岩奠茲持載
壽域既優神聰有賚禱祀誕隆寅威如在千載興運
八紘開基武功盪定文教緝熙封禪縟典祖宗制宜

逮夫聖嗣方畢宏規惟帝奉符惟神佑德茂績其凝
皇猷允塞嘉德沓臻鴻元靡測芄芄豐衍元元滋息
於赫靈廟控帶名區有詔改作俾受全模協心董役
豐資庀徒技殫功倍雷動星敷大厦咸新羣黎改觀
窅窅靚深崢嶸輪奐肅穆威容潔清几案欽修允宜
盼嚮攸贊功懋天作澤從雲游式諧民望昭報神休
殊號斯薦前古匪儔庶安億兆豈止懷柔天帝之孫
復升以帝出乎震宮臨乎日際事固莫京理亦潛契

樹此翠碑騰芳百世

國朝盛典

聖祖仁皇帝康熙二十三年甲子春二月翰林編修曹禾

吏科掌印給事中王承祖各疏請

東巡

詔廷臣集議 謹按

翰林院編修曹禾

題為恭請

皇上登封岱宗以告成功以昭盛德事臣聞祀典國之大
事帝王事天明事地察於是乎神祇降福人民悅豫
慶流久遠古者有常祀有特祀禮曰天子祭天地四
方山川五祀歲徧焉此常祀也四時舉行之禮也書
曰歲二月東巡狩至於岱宗柴望秩於山川此特祀
禮司馬遷所謂每世之隆則封禪答焉者也三五以
來昭姓考瑞必以其成功告於上帝臣考封禪書及
班固應劭服虔諸儒所言泰山五嶽之長神靈所聚

因高崇天謂之封就廣增地謂之禪明受天地之所
命功成事遂有益於天地若高者加高厚者加厚陰
陽和萬物序刻石紀號高世比德於九皇甚盛典也
逮秦漢唐宋之主有事岱宗者皆勒兵十數萬創立
宮殿更起明堂辟雍勞民費財失對越之意後世議
者遂不敢申明其禮獨詳於一歲中祈年報賽之常
祀不知祀天一也而禮有大小帝王受命於天左
右相之默成其功業故因名山升中與天相見報受命

之無負因之燔柴肆祀以答幽贊明欲其精神通於
真宰使神祇各率其職佑我皇極光我泰階天人之
際感召甚微其為典禮至尊至重洪惟我

太祖高皇帝誕膺圖籙

太宗文皇帝受寶握符

世祖章皇帝撫有區夏大命雖定而天下未寧人心未靖
三孽伏於方鎮海寇跳梁東南此乃

上帝神靈眷顧篤佑

皇上留遺艱難昭宣至德神功開大一統之業垂裕於萬世也伏見

皇上睿謀獨運動與天契決機制勝掃蕩都盡臺灣逋寇
警威歸化納土稽顙窮海萬里廓清無外

皇上聖德高深期臻上理雖六合同風而孜孜不已政化
翔洽流於無垠三光五行昭精布序年穀順成聲教
四訖閭閻安生樂業共見太平而奉琛職貢梯山航
海而來者不可勝數猗歟盛哉古帝有功德者莫過

於黃帝黃帝上元甲子貞元運會考定星歷建天地
神祇物類之官制作度數合符造化由是封巒勒成
遂開宇宙文明之象漢武帝不得其時則以十一月
甲子朔冬至應之而數千年之景運適協於今日功
成治定之後則統天之紀應地之時而立人之極端
在今日矣臣愚竊謂

皇上以精一執中為奉若宣樂於泥金刻石鋪張揚厲之
文然而

上帝之命不可不報山川百神之助不可不答而運世之本開基之功德不可不紀誠宜稽古禮文潤色鴻業勿憚登陟之勞亟議告成之典考漢唐之儀注行之簡易順承大慶維新庶政為生民錫福為奕葉儲休
光昭

祖

宗之洪烈休德將見瑞應游臻頌聲洋溢與黃帝之時同其盛美矣

臣

於歲首即懷此念慮蹈越位之罪既而

惟之受

恩深重報稱無由而敷陳經史導揚德化臣之職也拳拳

之誠冒瀆

宸聽奉

旨九卿詹事科道會議具奏

吏科掌印給事中王承祖

題為請倣古帝之巡狩以勤民事以光

聖治事臣仰見我

皇上乘泰運之始出維新之治屢頒

上諭戒飾臣工疏通仕路皆

軫念民生期登熙隆至意也誠德婉堯舜功邁漢唐矣方

今四海昇平要荒向化正觀風問俗勸課農桑之時

臣讀舜典所載歲二月東巡狩至於岱宗柴望秩於

山川肆觀東后臣竊惟其意岱宗居五嶽之首東方

為生氣之先二月乃東作之始燔柴祀天因所至而

祭告之至其協時月正日同律度量衡蓋皆為民事

也故載之於書令後世倣其意而行之我

皇上念切民瘼求登殷阜必以農功為先務請倣虞帝之
制巡幸東方察閭閻之利病問風俗之厚薄設祭方
嶽以祈年豐又聞泰山出雲不崇朝而雨天下是

聖帝一禱即澤沛萬方矣詩云以祈甘雨以介我稷黍以
穀我士女此之謂也且東嶽密邇孔里臣見史冊所
載漢高之魯以太牢祀孔子後世美其開一代之文
治倘

御輦所屆觀其車服禮器亦古今鉅觀而

皇上右文至意載之史冊誠千古不易見之盛事

臣讀史

記封禪書內云上古封禪者七十二君皆荒唐無稽
至秦皇漢武倣而行之不過耀德張功後世鄙焉我
皇上德接精一之傳博稽羣書上法虞帝行燔柴之禮不
襲封禪之事是

聖德神功光昭萬世矣奉

旨九卿詹事科道一併會議具奏

禮部為恭請

皇上登封岱宗以告成功以昭盛德事臣等會議得翰林

院編修曹

禾

疏請三五以來昭姓考瑞無不以其成

功告於上帝逮秦漢唐宋之主有事岱宗者類皆創立宮殿更起明堂辟雍勞民費財失對越之意後世議者遂不敢申明其禮洪惟我

皇上睿謀獨運動與天契決機制勝掃蕩都盡

上帝之命不可不報山川百神之助不可不答運世之本

開基之功德不可不紀宜亟議告成之典等語又科
臣王承祖疏稱巡幸東方察閭閻之利病問風俗之
厚薄設祭方嶽以祈年豐又聞泰山出雲不崇朝而
雨天下

聖帝一禱卽澤沛萬方矣且東嶽密邇孔里臣見史冊所
載漢高至魯以太牢祀孔子後世美其開一代之文
治倘

御輦所屆觀見車服禮器亦古今鉅觀而

皇上右文之至意載之史冊誠千古不易見之盛事臣讀
史記封禪書內云上古封禪者七十二君皆荒唐無稽
至秦皇漢武倣而行之不過耀德張功後世鄙焉我

皇上德接精一之傳博稽羣書上法虞帝行燔柴之禮不
襲封禪之事是

聖德神功光昭萬世等語伏察封禪之說不著於經書傳
言舜至岱宗燔柴以祀天原非封禪唐虞三代以前

實無登封故事科臣王承祖疏稱封禪之禮後世鄙

焉編修曹禾請封禪以告成功之處無庸議又王承

祖疏稱請倣虞舜巡幸東方察閭閻之利病問風俗
之厚薄設祭方嶽以祈年豐漢高至魯以太牢祀孔
子後世美其開一代之文治恭惟我

皇上博綜經學弘闡心傳重道崇文千古莫並且

軫念民依省方問俗

鑒輿所至

訓飭官方特加蠲賑此皆勤民重農至意如

皇上巡問民俗經過泰山闕里應倣行虞舜燔柴漢高祖

祀孔子禮致祭等因奉

旨着候旨行應行典禮該部即詳察具奏

秋九月

聖祖仁皇帝稽古東巡十九日壬午昧爽

發德音肆赦天下

詔曰帝王誕膺景命統御萬邦道重觀民政先求瘼是以

虞廷肆覲肇舉省方周室懷柔式歌時邁詩書具在典
制丕著朕仰荷

天休纘承

祖烈撫茲兆庶期底時雍夙夜孜孜懋求治理以富
以教靡敢怠遑猶慮節屋艱難罔由上達故於直
隸郡縣周覽巡行勤施補助更念山左等處土宜
俗尚不加循省曷克真知矧歷逢甲子世際昇平
聿圖泰運之恒新在措芸生於豫大業時命駕咨

彼民依但樂利祇慰夫一方而德澤未敷於九有
朕心歎焉用是特昭公普以弘仁庶秦誠和之盛
治一江南浙江江西湖廣省分自用兵以來供應
繁苦宜加恩卹康熙二十四年所運漕糧著免三分
之一一自康熙十三年起至二十二年拖欠漕項錢
糧著自康熙二十三年起每年帶徵一年以免小民
一時並徵之累東巡經過地方宜俱加恩卹著將康
熙二十四年應徵丁銀盡行捐免一泰山經過致祭

其四嶽四瀆等祀應遣官致祭察例舉行一凡官吏兵

民人等有犯除十惡等罪不赦外

凡常赦所不原者不在赦內

其餘

自康熙二十三年九月二十四日昧爽以前死罪軍罪以下已發覺未發覺已結正未結正咸赦除之有以赦前事告訐者以其罪罪之一直隸各省修理文廟銀兩照舊存留以供整葺一直隸各省解費腳價銀兩仍復存留照額支給一祭祀行香習儀及祈晴祈雨鄉飲酒禮等項銀仍復存留以供支用一嶽鎮四瀆廟宇傾頽

者該地方官設法修葺以昭誠敬一内外文武官員現應議處者俱著寬免一内外文武大小各官除各以現在品級已得封贈外凡授職陞級及改任者著照新銜封贈一各處孤貧口糧已復存留經管地方務須從實給散以贍窮獨於戲時臻熙皞彌隆寬卹之恩戶樂清寧丕篤綿長之慶布告天下咸使聞知 凡經過地方各有加

恩自親王以下宗室覺羅内大臣侍衛内務府武備院上

駟院鑾儀衛各官及各旗護軍統領前鋒統領等官
至各衙門扈從官及各執事人員俱預行派出接次
隨行

駕發京師日鹵簿大駕陳設如常儀隨從不隨從王以下
文武各官各跪送隨行如常儀所過鴻臚寺官先期
傳知百里以內地方官率本地鄉紳士民迎於十里
之外本地鎮守滿漢官軍整隊伍迎於十里之外分
文武東西候

駕至跪迎送如常儀十月壬寅至於岱宗

躬祀

東嶽

禮部題定儀注

前期太常寺用白紙糊版黃紙鑲邊墨書祝版不書

御名太常寺官具補服捧送

廟中安設祝案上其

神位前陳設禮神制帛一

青色

圓降真炷香一炷黃速香

一觔白磁爵三牛一羊一豕一登一鉶二簠二簋二

簋十豆十酒一尊燭二對燈十盞陳設畢禮部太常寺堂官奏請

皇帝具禮服陞輦儀仗全設扈從王以下內大臣侍衛文武官三品以上及地方文官知府以上武官副將以上俱朝服陪祀其餘文武各官俱於行宮前兩旁朝服跪送

皇帝入

廟至二門降輦贊引官對引官恭導

皇帝入

殿中門至拜位前立典儀唱執事官各司其事贊引官

奏就位

皇帝就拜位立典儀唱迎

神贊引官恭導

皇帝詣香案前立司香官捧香盒跪進於

皇帝右贊引官奏上香

皇帝舉炷香上爐內又三上瓣香畢贊引官奏旋位

皇帝旋位立贊引官奏跪叩興

皇帝行二跪六叩頭禮陪祀王以下各官俱隨行禮興典

儀唱奠帛行初獻禮捧帛官至

神位前奠帛三叩頭退次捧爵官至

神位前立獻爵畢次讀祝官至祝案前一跪三叩頭捧

祝版跪案旁祇候贊引官奏跪

皇帝跪王以下各官俱跪贊引官贊讀祝讀祝官讀祝祝

文曰朕惟五嶽視三公而泰岱為之長古帝巡行時邁

所過名山大川必按圖職方敬修祀事昭垂典禮自昔
為隆是以虞史著望秩之文周詩有懷柔之頌朕荷

天眷命罔敢寧居省俗觀風勤求民隱爰以良月至於岱
宗惟

神屹峙東方育成庶類天齊巨鎮功開萬物之先日觀
崇標尊為百靈之府吉蠲用享虔事惟誠宣氣布和徧
神庥而沛澤始元啓泰翊景運以徵祥祇薦馨香
神其歆鑒讀畢捧祝文至

神位前跪安帛匣內三叩頭退贊引官奏叩興

皇帝行三叩頭禮興王以下各官俱隨行禮畢典儀唱行
亞獻禮捧爵官獻爵於左如初獻儀典儀官唱行終
獻禮捧爵官獻爵於右如亞獻儀典儀唱送

神贊引官奏跪叩興

皇帝行二跪六叩頭禮王以下各官俱隨行禮興典儀唱
捧祝帛恭詣燎位捧祝帛官至

神位前跪捧祝帛三叩頭司香官跪捧炷香不叩依次

捧送燎位

皇上轉立東旁候祝帛香過還位立祝帛焚半贊引官奏

禮畢

皇上陞輦還行宮不陪祀文武各官俱於

行宮前排班跪迎候

駕過各退

御書廟額曰配天作鎮既登岱十月十一日大學士明珠

王熙奉

諭旨朕夙夜孜孜勤求治理深宮寧處軫念間間諏吉時
巡省觀民隱經行所至登於泰山至聖遺跡緬然如睹
一覽衆山臨眺九有洵足攬天下之勝察造化之奇援
筆濡毫書成普照乾坤四字可於孔子小天下處建亭
懸額復書雲峰二字可於極頂處磨厓勒石其本年香
稅免解該部用以鳩工庀材虔修泰山頂上各廟應行
事宜爾會同該撫確議具奏

駕至江南

回鑾

躬詣闕里致祭

先師孔子講書於詩禮堂復遣親王致祭

元聖周公

幸魯典禮另
詳闕里志

駕還京師不隨從王以下文武各官朝服跪迎如常儀

二十八年正月

聖祖仁皇帝南巡

諭朕閱視河工巡省地方恐有司煩勞百姓著行令該督

撫嚴飾地方官所過道途停止修治至山東

躬率文武諸臣望

岱宗扈從諸臣奉

諭旨朕巡歷所至再經岱麓重瞻祠宇詢其廟祝知香火
荒涼日用難給岱頂諸廟亦復如之念泰山為五嶽之
長載在祀典有功社稷不宜使之漸就寥落合將每歲
香稅錢糧內量給數百金使上下嶽廟與元君諸祠守
祀者得有資賴曉夜盡心兼可時加修葺以壯往來觀

瞻示朕崇祀之意爾諸臣即與山東巡撫藩臬會議以
聞正月十五日山東巡撫錢珏奉

諭旨朕軫恤民隱載舉時巡懋宣德化勤求疾苦比至山
東所經城邑百姓扶老攜幼夾道歡迎朕問及連歲順
成民生少得安業第思百姓足則國家克裕若期比戶
豐盈必以蠲租減賦除其雜派為先邇年以來各省地
丁錢糧已經節次豁免山東地丁正賦意欲來歲蠲除
茲因巡幸至此特先諭該撫速行曉示日傳三百里遐

村僻壤咸使聞知以副朕省耕問俗之意特諭

駕入江南境

閱視中河至浙江會稽山由江寧府

回鑾 三十八年

聖祖仁皇帝南巡前期

諭朕撫馭寰區四方無事獨淮黃兩河為患屢遣大臣督
理竟無成功今諸臣請朕親臨指示因命擇吉南行親
加詳勘至於吳越襟帶江湖亦為省耕勵俗凡來往所

需諸物俱由京師備辦即沿途日用亦令各該衙門照時價採買並無纖毫擾民倘官吏有私行派取者察出即以軍法從事其扈從大小官員隨行僕役橫生事端一併從重治罪凡所經行地方百姓不必迴避照常貿易耕耘行令該督撫示諭各府州縣

駕發京師由水路經山東境至江南清河

臨視隄防至浙省復經山東境

回鑾五月初六日戶部奉

諭旨朕巡省民生風俗南至於江浙茲以返蹕行經山東
緣途延見父老諮詢農事幸今歲雨暘時若二麥繼登
小民可以無憂粒食但前年被災泰安等二十七州縣
生計尚未豐盈宜更加恩休養所有康熙三十六年未
完地丁銀米俱著免徵其三十七年應徵錢糧原因災
傷令於三十八年完納今念一歲之內竝輸二歲之租
恐物力艱難未能兼辦著分作三年帶徵以示寬恤爾
部移文該撫轉飭有司明白張示務使窮鄉僻壤均沾

實惠以無負朝廷曲軫民依至意倘有不肖官吏私徵
侵蝕致上澤不下及者察出定治重罪爾部即遵諭行
特諭 四十二年

聖祖仁皇帝南巡

閱河至山東泰安州

祭岱遣領侍衛內大臣於

嶽廟致祭正月十六日戶部奉

諭旨朕甲子巳巳兩次南巡路經東省見民生豐裕士庶

共慶近來淮黃告成朕不辭遠涉減從輕行待旦而興
夜分乃寐再經齊魯存問民生休戚似不及甲子己巳
朕深憚怛痼瘵之在抱也若閭閻蓄積有餘即遇有水
旱亦不致困苦今特加恩蠲恤用弘愛養朕所經過地
方德州平原禹城齊河歷城長清恩縣夏津武城館陶
臨清清平博平堂邑聊城東阿陽穀壽張滕嶧二十州
縣康熙四十一年未完地丁錢糧著通行蠲免濟南府
屬之海豐利津霑化兗州府屬之寧陽滋陽泗水金鄉

單曹鄆城曲阜費十二州縣去歲農收歉薄四十一年未完錢糧亦通行免徵其去歲曾被水災者東平新泰蒙陰沂州沂水萊蕪六州縣康熙四十二年地丁錢糧已經全免外四十一年未完錢糧亦俱著全免其泰安鄒城魚臺汶上嘉祥鉅野濟寧七州縣雖未成災四十一年未完錢糧俱著蠲免四十二年地丁錢糧著分三年帶徵爾部即移文該撫董率各州縣有司詳慎奉行務令入需實惠戶有餘藏以稱朕重期黎元殷阜之至

意有不肖官吏侵蝕私徵者察出定從重治罪爾部即
遵諭行特諭

駕入江南境迨途

閱視河防至浙省由江寧府

回鑾以河工告成

大沛恩膏

頒詔天下 四十四年

聖祖仁皇帝南巡

閱河由山東入江南境

臨視河工至浙省由江寧府復經山東境

回鑾閏四月二十日山東巡撫趙世顯奉

諭旨朕因四方無事車駕南巡得訪民情深知利弊回舟
山左見麥秋大熟民無菜色朕心甚慰凡鑾輿所臨加
恩宥過企望刑期無刑也東省前歲儉收衣食惟艱所
以犯法者衆嘗念臨下之道惠化為先原情之仁含育
在宥是宜悉除愆咎盡起枯沈可將山東所屬地方人

犯亦照江南浙閩恩例概從末減自康熙四十四年閏四月二十日以前凡罪犯詔款不應赦者不赦外其餘死罪以下已發覺未發覺俱著減等發落四十三年秋審奉旨監候緩決者一併減等發落仍開具人數奏聞但山東人性彊悍輕生為盜者頗多爾等不時訓誨教養以副朕愛惜人命之至意頒示六府曉諭闔省特諭

聖祖仁皇帝南巡筆記

康熙甲子春日有以時值上元請行封禪又巡狩燔柴

諸典禮者夫朕涼德菲躬臨御海寓邇年以來水旱兵
戈民亦勞止雖邀天庇佑四海蕩平萬姓樂業實未有
豐功偉烈足以昭示來茲何敢效法前人銘功紀德至
於巡狩古天子所以周省侯國使諸侯肆覲明堂考其
政績今天下之權統一於內督撫之賢不肖朕皆得而
知之又無事於巡狩之名也惟是近畿郡邑屢經巡幸
補助時施而東南黎民風俗尚未周知乃於秋九月陳
請

兩宮暫違定省二十八日出京師經河間過德州閱濟南城觀趵突泉題曰激湍百姓遮拜馬首戶口繁盛比屋可封昔稱臨淄之間肩相摩轂相擊者今尚有遺風馬十一日至泰山石徑峻嶒緩步登陟四十里御障崖瀑水懸流五大夫枯松猶在巖畔或亦後人繼植者入南天門捫秦時無字碑至孔子小天下處真可收羅宇宙暢豁襟懷題普照乾坤雲峰諸字宿泰山巔月色清明賦詩遣興來日登日觀峰看扶桑日出下山祀於嶽廟

嶽為五方之長發生萬物故躬祀之為蒼生祈福十三
日雨雪駐蒙陰縣侍臣云明日小雪喜其應候詰朝雪
霽望蒙山峰頂半入雲霧或隱或現其上石衣土人攀
絕取之名蒙山頂上茶嘗考四川雅州有蒙山五峰極
高峻上產甘露茶世所傳者或雅州之蒙山也渡沂水
取魚既多且鮮因遣使馳進

兩宮以志思戀之懷蒞花鋪青淮之界居人輻輳十八日
發宿遷縣閱黃河北堤岸一百八十里頻年水患工役

浩繁民俗罷敝不若山左之庶饒渡河過清浦淮安府
商賈往來舟楫如織寶應縣高郵州邵伯鎮皆以湖水
泛濫未復故道居人草屋臨流牀竈半在水中朕甚憫
焉登岸步行十餘里觀察水勢召集耆老秀才細訪其
故皆云自海口壅塞水無所歸二十年來田畝已成巨
浸賦詩紀事思所以拯濟之二十三日抵維揚市肆繁
華園亭相望遊平山堂天寧寺百姓持香夾道意甚誠
敬平山堂乃宋臣歐陽修所建修以文學侍從之臣出

知揚州為政之暇優游談讌傳為佳話故朕詩有文章
太守心偏憶之句二十四日將由儀真幸江寧府忽遇
順風可以速達京口遂乘沙船順流而下波恬浪靜瞬
息七十里沙船江中戰艦也自岳州長沙用兵以來多
得其力今河海清晏當時戰具僅供渡江之用然安不
忘危朕於此時未嘗不念艱難用武之際次早登金山
孤巒隱岫屹峙大江中飛閣流丹金碧照灼更有一峰
離立曰善才石郭璞墓在其西上有妙高臺留雲亭朝

陽洞下有中冷水稱天下第一泉朕率扈從諸臣一一
探眺縱目千里題江天一覽四字并賦二詩竹林禪院
在鎮江府城南五里曲徑逶迤茂林修竹高者四五丈
大者圍尺青葉碧枝陰森崖谷實北地之所未有晚而
登舟揚帆丹陽縣常州府無錫縣俱未及泊一晝夜行
三百六十餘里達姑蘇舟人云從無如此之速者二十
七日由楓橋入閭門登城閱視士民觀瞻莫不忭舞有
獻賦頌者是日駐蹕城中念執事人役辛勤遠來徧賞

白金聽其各帶方物以示體恤二十八日回鑾過虎邱山不甚高亭榭闌檻布滿其上千人石高下可容千人傳為生公講經處故旁有點頭石劒池在夾崖中殊可觀平遠堂俯瞰虎邱之背田疇林木望若錯錦蘇民仍列酒坊茶肆各安生業管絃競奏覺有昇平景象然從事紛奢罔知務本未若東北風俗之樸實耳夜坐舟中與侍臣高士奇探論古今興廢之跡或論尚書左傳及先秦兩漢文數篇或談周易或賦一詩每至漏下三十

刻不倦日以為常蓋詩書意味深長不似耳目之好易
於煩厭也舟過無錫縣遊錫山觀惠泉石甃八角池水
色淳泓味較玉泉遠不相及不知前人何以稱之為第
二泉二十九日由丹陽縣陸行初一日過句容縣蜿蜒
石堤數十里抵江寧府雨花臺在城南登之則江山城
郭歷歷可見報恩寺規制弘壯寶塔九級金碧琉璃盡
鏤梵相結構之巧殆竭人工非前代內帑所修不能至
此城中闌闕克實烟火萬家景物太平昔稱六朝佳麗

今亦不減大都也明日祭明洪武陵見其頽廢勅地方
官禁護之過明故宮僅存遺址不禁慨然作過金陵論
并賦一詩登觀星臺望後湖題曠觀二字又明日再遣
使進

兩宮方物閱鎮將射於教場頒賜扈從諸臣幣帛督撫御
衣初四日發江寧府泊燕子磯峭壁臨江亦有勝致初
十日閱高家堰堤工望洪澤湖汪洋千頃復由河南岸
行一百八十里過桃源縣十一日渡河至宿遷次日駐

蹕蒞花鋪自剡沂州取道東兗渡沂濟祊汶泗諸水

按途

驗水濟當作涑汶當作浚疑傳寫之誤


泗水出陪尾山下泉林寺側石穴

吐水衆泉俱導古樹成林有石碑刻子在川上處然闕里志載孔子觀川亭在尼山宣聖廟側未知孰是十六日長至節天氣晴煖無朔風祁寒扈從諸人莫不欣喜十七日過少昊陵顏子林駐蹕曲阜縣南十八日黎明祀於闕里齋心穆穆若有所見禮畢坐詩禮堂命孔氏子孫講周易大學徧觀車服禮器及漢唐碑版檜樹在

大成門內古榦蒼然苔蘚潤澤真靈蹟也敬想至聖道冠百王前代留金銀器具皆人力可辦獨以仗前曲柄龍蓋留廟中並書萬世師表四字過闕里詩古檜賦出北門醜酒孔子墓下伯魚墓在孔子墓東十餘步子思墓在其前西有子貢廬墓之所左有宋真宗駐蹕亭林中奇樹蔥鬱未可計數行三十里駐蹕兗州府杜甫所謂浮雲連海岱平野入青徐是也念周公制禮作樂道接文武頃過曲阜未得躬謁廟庭特製祭文遣親藩代

祀之遂由汶上東阿高唐至德州亟欲定省

兩宮兼程而歸是行也往返數旬所歷山東江南諸郡縣
日以周諮民隱體察吏治為首務行道之頃復得覽其
山川憑弔古蹟至於地方利弊則將有以斟酌損益焉
率筆記之示朕之不徒事遊豫也



山東通志卷十之一

欽定四庫全書

史部

山東通志卷十之二

詳校官監察御史臣劉涓

檢討臣德生覆勘

總校官知縣臣繆琪

校對官編修臣盧遂

謄錄監生臣沈一謬

欽定四庫全書

山東通志卷十之二

巡狩志下

附封禪

歷代封禪

夏按山海經禹曰天地之東西二萬八千里南北二萬六千里出水之山者八千里受水者八千里出銅之山四百六十七出鐵之山三千六百九十此天地之所分壤樹穀也戈矛之所發也刀鍛之所起也能

者有餘拙者不足封於泰山禪於梁父七十二家得失之數皆在此內是謂國用

此紀封禪之始管子地數篇亦載此語刀鍛作

幣刀

周漢書郊祀志云齊桓公既霸會諸侯於葵丘而欲封禪管仲曰古者封泰山禪梁父者七十二家夷吾所記者十有二焉昔無懷氏封泰山禪云云慮羲氏封泰山禪云云神農氏封泰山禪云云炎帝封泰山禪云云黃帝封泰山禪亭顓頊封泰山禪云云帝嚳封泰

山禪云云堯封泰山禪云云舜封泰山禪云云禹封
泰山禪會稽湯封泰山禪云云周成王封泰山禪於
社首皆受命然後得封禪桓公曰寡人北伐山戎過
孤竹西伐東馬縣車上卑耳之山南伐至召陵登熊
耳山以望江漢兵車之會三乘車之會六九合諸侯
一匡天下諸侯莫違我昔三代受命亦何以異乎於
是管仲賁桓公不可窮以辭因設之以事曰古之封
禪鄣上黍北里禾所以為盛江淮間一茅三脊所以

為藉也東海致比目之魚西海致比翼之鳥然後物
有不召而自致者十有五焉今鳳凰麟麟不至嘉禾
不生而蓬蒿藜莠茂鴟梟集羣翔而欲封禪無乃不可

乎桓公乃止

按史記封禪書西伐大夏涉流沙漢書
節去五字又管子雜篇有封禪第五十

原篇不存班固白虎通曰王者易姓受命而起必升
封泰山何教告之義也始受命之時改制應天天下
太平功成封禪以告太平也所以必於泰山何萬物
所交代之處必於其上何因高告高順其類也故升
封者增高也下禪梁甫之山基廣厚也刻石紀號者
著已之功績以自致也天以高為尊地以厚為德故
增泰山之高以報天附梁甫之趾以報地明天地之
所命功成事遂有益於天地若高者加高厚者加厚

矣或曰封者金泥銀繩或曰石泥金繩封以印璽故
孔子曰升泰山觀易姓之王可得而數者七十有餘
封者廣也言禪者明以成功相傳也於梁甫何以三
皇禪繹繹之山明已成功而告有德者居之繹繹者
無窮之意也五帝禪於亭亭者量度審諛德著明也
三皇禪於梁甫之山者梁信也甫輔也輔天地之道
而行之也太平乃封告於天必也於岱宗何明告易
姓刻石紀號告自紀於百王也燎祭天報之義也詩
云於皇時周陟其高山
言周太平封泰山也

秦始皇帝三年東巡狩郡縣祠騶嶧山頌功業於是
從齊魯之儒生博士七十人至於泰山下諸儒或議
曰古者封禪為蒲車惡傷山之草石土木掃地而祠

席用苴稽言其易遵也始皇聞此議各乖異難施用
由此黜儒生而遂除車道上自泰山陽至顛立石頌
德明其得封也從陰道下禪於梁父其禮頗采泰祝
之祀雍上帝所用而封藏皆秘之世不得而記也始
皇之上泰山中阪遇暴風雨休於大樹下諸儒既黜
不得與封禪聞始皇遇風雨即譏之於是始皇遂東
游海上行禮祠名山川及八神蓬萊仙人羨門之屬始
皇封禪之後十二年而秦亡諸儒生疾之皆說曰始

皇上泰山為風雨所擊不得封禪云

服虔曰封增土之高歸功於天

禪闢廣土地也張晏曰天高不可及於泰山封禪而祭冀近神靈也攢曰積土為封謂負土於泰山上為壇而祭之除地為壇祭於梁父後改壇為禪神之矣祭尚玄酒而俎魚殽皆廣長十二丈壇高三尺階三等而樹石泰山之上高二丈一尺廣三尺席用菹稽說文菹茅藉也稽禾藁也去其皮以為席周禮祭祀供茅菹司馬遷曰自古受命帝王曷嘗不封禪蓋有無其應而用事者矣未有睹符瑞見而不臻於泰山者也孔子論述六藝傳略言易姓而王封泰山禪乎梁父者七十餘王矣其俎豆之禮不章蓋難言之始皇上泰山中阪遇暴風雨休於大樹諸儒譏之此豈所謂無其應而用事者耶

李斯篆刻石文

事天以禮立身以義事父以孝成人以仁四海之內
莫不郡縣四夷八蠻咸來貢職人庶蕃息天祿永得
皇帝臨位作制明法臣下修飾二十有六年初并天
下罔不賓服親巡遠方黎民登茲泰山周覽東極從
臣思迹本原事業祇誦功德治道運行諸產得宣皆
有法式大義休明垂於後世順承勿革皇帝躬聖既
平天下不懈於治夙興夜寐建設長利專隆教誨訓
經宣達遠近畢理咸承聖志貴賤分明男女禮順慎

遵職事昭格內外靡不清淨施於後嗣化及無窮遵

奉遺詔永承重戒

按事天以禮十句乃始皇封岱所刻自皇帝臨位以下則二世東巡

刻始皇所立石以表先世功德之詞范氏曰古者天子巡狩至於方嶽必告祭柴望所以尊天而懷柔百神也後世學禮者失其傳而諸儒之諂諛者為說以希世主謂之封禪實自秦始古無有也人主不法三代而法秦亦已謬矣

漢文帝十六年夏四月上郊祀渭陽五帝廟使博士

諸生刺六經中作王制議巡狩封禪

武皇帝元鼎四年汾陰得大鼎迎至甘泉薦之郊廟

羣臣皆賀自得寶鼎上與公卿諸生議封禪封禪用
希曠絕莫知其儀體而羣儒采封禪尚書周官王制
之望祀射牛事齊人丁公年九十餘曰封禪者古不
死之名秦皇帝不得上封陛下必欲上稍上即無風
雨遂上封矣上於是迺令諸儒習射牛草封禪儀數
年至具行天子既聞公孫卿及方士之言黃帝以上
封禪皆致怪物與神通欲放黃帝以接神人蓬萊高
世比德於九皇而頗采儒術以文之羣儒既已不能

辯明封禪事又拘於詩書古文而不敢騁於是上書

罷諸儒弗用

武帝議封禪諸儒對者五十餘人未能有所定先是司馬相如病死有遺書頌

功德言符瑞足以封泰山上嘉其書以問倪寬寬對曰陛下躬發聖德統攝羣元宗祀天地薦禮百神精神所嚮徵兆必報天地並應符瑞昭明其封泰山禪梁父昭姓考瑞帝王之盛節也然享薦之儀不著於經以為封禪告成合祛於天地神祇祇戒精專以接神明總百官之職各稱事宜而為之節文惟聖主所由制定其當非羣臣之所能列今將舉大事優游數年使羣臣得人自盡終莫能成惟天子建中和之極兼總條貫金聲而玉振之以順元封元年春三月東成天慶垂萬世之基上然之

幸緱氏禮登中嶽太室從官在山上聞有言萬歲云

本記吏卒咸間
呼萬歲者三

因東上泰山泰山草木未生迺令人

上石立之泰山顛上遂東巡海上行禮祠八神四月

還至奉高上念諸儒及方士言封禪人人殊不經難

施行天子至梁父禮祠地主至乙卯令侍中儒者皮

弁縉紳射牛行事封泰山下東方如郊祠泰一之禮

封廣丈二尺高九尺其下則有玉牒書書秘禮畢天

子獨與侍中奉車子侯上泰山

子侯霍去
病子也

亦有封其

事禁明日下陰道丙辰禪泰山下趾東北肅然山如

祭后土禮天子皆親拜見衣上黃而盡用樂焉江淮
間一茅三脊為神藉五色土益離封縱遠方奇獸飛
禽及白雉諸物頗以加祠兕牛象犀之屬不用皆至
泰山然後去封禪祠其夜若有光晝有白雲出封中

天子從禪還坐明堂

周之明堂

羣臣更上壽詔曰朕以眇

躬身承至尊兢兢焉惟德菲薄不明於禮樂故用事

八神遭天地貺施著見景象屑然如有聞震於怪物

欲止不敢

上祠八神時公孫卿持節常先行候名山至東萊言夜見大人長數丈就之則不見

見其迹甚大類禽獸云羣臣有言見一老父牽狗言吾欲見鉅公已忽不見遂登泰山至

於梁父然後升禮肅然

山名在梁父見前

自新嘉與士大夫

更始其以十月為元封元年行所巡至博奉高蛇丘

歷城梁父民田租逋賦貸已除加年七十以上孤寡

帛人二匹四縣無出今年算

奉高一縣素以供神不在算限

賜天下

民爵一級女子百戶牛酒又曰古者天子五載一巡

狩用事泰山諸侯有朝宿地其令諸侯各治邸泰山

下行自泰山復東巡海上

帝欲自浮蓬萊求神仙羣臣諫莫能止東方朔曰夫

仙者得之自然不必踰求若其有道不憂不得若其無道雖至蓬萊見仙人亦無益也臣願陛下第還宮靜處以須之仙人將自至上乃死至碣石自遼西歷北還是時奉車子侯暴病一日死

邊九原歸於甘泉二年夏旱公孫卿曰黃帝時封則天旱乾封三年上迺下詔天旱意乾封乎其令天下尊祠靈星焉秋作明堂於泰山下初天子封泰山泰山東北陞古時有明堂處處險不敞上欲治明堂奉高旁未曉其制度濟南人公玉帶上黃帝明堂圖明堂中有一殿四面無壁以茅蓋通水水圜宮垣為複

道上有樓從西南入名曰崑崙天子從之入以拜祀
上帝焉於是上命奉高作明堂汶上如帶圖五年冬
帝南巡江漢遂北至琅琊並海所過禮祠其名山大
川春三年還至泰山增封甲子祠泰一五帝於明堂
望合高皇帝祠坐對之祠后土於下房以二十太牢
天子從崑崙道入始拜明堂如郊禮畢燎堂下而上
又上泰山自有秘祠其巔而泰山下祠五帝各如其
方黃帝并赤帝所有司侍祠焉山上舉火下悉應之

因朝諸侯王列侯受郡國計夏四月詔曰朕巡荆揚
輯江淮物會大海氣以合泰山上天見象增修封禪
其赦天下所幸縣毋出今年租賦賜鰥寡孤獨帛貧
窮者粟太初元年冬十月帝幸泰山以十一月甲子
朔旦冬至日祀上帝於明堂後每修封其贊饗曰天
增授皇帝泰元神策周而復始皇帝敬拜泰一十二
月甲午朔上親禪高里

山名在泰山下

祠后土臨勃海望祀

蓬萊還受計於甘泉三年春正月行東巡海上夏四

月還修封泰山禋石間初公玉帶曰黃帝時雖封泰山然風后封鉅岐伯令黃帝封東泰山禪凡山合符然後不死天子既令設祠具至東泰山東泰山卑小不稱其聲迺令祠官禮之而不封焉其後令帶奉祠後神物復還泰山修五年之禮如前而加禪祠石間石間者在泰山下趾南方方士言仙人間也故上親禪焉天漢三年春三月行幸泰山修封祀明堂因受計太始四年春三月行幸泰山甲申修封丙戌禋石

閭征和四年春正月行幸東萊三月還幸泰山修封

泰山五年一修封癸巳禋石閭祀明堂罷方士候神人

者上至是乃言曰朕即位以來所為狂悖使天下愁

罷之田千秋曰方士言神仙者甚衆而無顯功請皆
罷斥遣之上是其言悉罷諸方士候神人者是後上
每對羣臣自歎向時愚惑為方士所欺天下豈
有仙人盡妖妄耳節食服藥差可少病而已

附司馬相如封禪書其辭曰伊上古之初肇自顓
生民歷選列辟以迄乎秦率邇者踵武逖聽者風聲
紛輪歲耨湮滅而不稱者不可勝數也繼韶夏崇號
謚略可道者七十有二君罔若叔而不昌疇逆失而
能存軒轅之前遐哉邈乎其詳不可得聞已五三六
經載籍之傳維風可觀也書曰元首明哉股肱良哉

因斯以談君莫盛於堯臣莫賢於后稷后稷創業於
唐堯公劉發迹於西戎文王改制爰周郅隆大行越
成而後陵遲衰微千載亡聲豈不善始善終哉然無
異端慎所由於前謹遺教於後耳故軌迹夷易易遵
也湛恩龐洪易豐也憲度著明易則也垂統理順易
繼也是以業隆於襁褓而崇冠乎二后揆厥所元終
都攸卒未有殊尤絕迹可考於今者也然猶躡梁甫
登泰山建顯號施尊名大漢之德逢涌原泉沕滴曼
美旁魄四塞雲布霧散上暢九垓下沂八埏懷生之
類沾濡浸潤協氣橫流武節茲逝通衢隘游原遐濶泳
未首惡鬱沒闇昧昭晰昆蟲聞憚回首面內然後囿
駒虞之珍羣散麋鹿之怪獸導一莖六穗於庖犧雙
舸共抵之獸獲周餘放龜於岐招翠黃乘龍於沼
鬼神接靈囿實於閒館奇物譎詭俶儻窮變欽哉符
瑞臻茲猶以為德薄不敢道封禪蓋周雖魚隕杭休
之以燎微夫斯之為符也以登介丘不亦慙乎進讓

之道何其爽與於是大司馬進曰陛下仁育羣生義
征不譖諸夏樂貢百蠻執贄德侔往初功無與二休
烈浹洽符瑞衆變期應紹至不特創見意者泰山梁
父設壇場望幸蓋號以況榮上帝垂恩儲祉將以慶
成陛下謙讓而弗發也挈三神之歡缺王道之儀羣
臣慙焉或謂且天為質闡示珍符固不可辭若然辭
之是泰山靡記而梁甫固幾也亦各並時而榮咸濟
厥世而屈說者尚何稱於後而云七十二君哉夫修
德以錫符奉符以行事不為進越也故聖王弗替而
修禮地祇謁款天神勤功中岳以章至尊舒盛德發
號榮受厚福以浸黎民皇皇哉斯事天下之壯觀王
者之卒業不可貶也願陛下全之而後因離縉紳先
生之略術使獲昨日月之末光絕炎以展采錯事猶
兼正列其義被飾厥文作春秋一藝將襲舊六為七
據之無窮俾萬世得激清流揚微波蜚英聲騰茂實
前聖之所以永保鴻名而常為稱首者用此宜命掌

故悉奏其儀而覽焉於是天子佈然改容曰俞乎朕其試哉乃遷思回慮總公卿之議詢封禪之事詩大澤之博廣符瑞之富遂作頌曰自我天覆雲之油油甘露時雨厥壤可游滋液滲漉何生不育嘉穀六穗我穉曷蓄匪唯雨之又潤澤之匪唯徧之我汜布護之萬物熙熙懷而慕思名山顯位望君之來君兮君兮侯不邁哉般般之獸樂我君圓白質黑章其儀可嘉旼旼穆穆君子之態蓋聞其聲今親其來厥塗靡從天瑞之徵茲爾於舜虞氏以興濯濯之麟游彼靈時孟冬十月君但郊祀馳我君與帝用享祉三代之前蓋未嘗有宛宛黃龍興德而升采色炫耀煥炳輝煌正陽顯見覺寤黎烝於傳載之云受命所乘厥之有章不必諄諄依類託寓諭以封巒披蓊觀之天人之際已交上下相發允荅聖王之德兢兢翼翼故曰於興必慮衰安必思危是以湯武至尊嚴不失肅祗舜在假典顧省闕遺此之謂也一本奉符作奉命茲

爾作咨爾炫
耀作元耀

後漢光武帝建武三十年二月羣臣上言即位三十

年宜封禪泰山

東觀書載太尉趙熹上言曰自古帝王每世之隆未嘗不封禪陛下聖德

洋溢順天行誅撥亂中興作民父母修復宗廟救萬
姓命黎庶賴福海內清平功成治定羣司禮官咸以
為宜登封告成為民報德百王所同當仁不讓宜登
封岱宗正三雍之禮以明靈契望秩羣神以承天心
也
詔書曰即位三十年百姓怨氣滿腹吾誰欺欺天

乎曾謂泰山不如林放何事汙七十二代之編錄桓
公欲封管仲非之若郡縣遠遣吏上壽盛稱虛美必

髡兼令屯田從此羣臣不敢復言三月上幸魯漢祀

天子行有所之出河沈用白馬珪璧各一衣以繒緹五尺祀用脯二束酒六升鹽一升涉渭灊涇雒佗名水如此者沈珪璧各一律在所給祠具及行沈祠過佗川水先驅投石少府給珪璧不滿百里者不沈過

泰山告太守以上過故承詔祭山及梁父

風俗通曰博縣十月

祀岱宗名曰合凍十二月涸凍正月解凍太守潔齋親自執事作脯廣一尺長五寸既祀訖取泰山君夫人座前脯二十朐太守拜章縣次驛馬傳送雒陽三十二年正月上齋夜讀

河圖會昌符曰赤劉之九會命岱宗不慎克用何益於承誠善用之姦偽不萌感此文乃詔虎賁中郎將

梁松等復案索河雒識文言九世封禪者凡三十六

事

東觀書曰羣臣奏言登封告成為民報德百王所同陛下輒拒絕不許臣下不敢頌功述德業河雒

識書赤漢九世當巡封泰山凡三十六事傳奏左帷
陛下遂以仲月令辰遵岱嶽之正禮奉圖雒之明文
以和靈瑞以為兆民上曰至泰山乃復
議國家德薄災異仍至圖識蓋如此

於是張純等

復奏請封禪上乃許焉詔有司求元封故事議封禪

所施用有司奏當用方石再累置壇中皆方五尺厚

一尺用玉牒書藏方石牒厚五寸長尺三寸廣五寸

有玉檢又用石檢十枚列於石傍東西各三南北各

二皆長三尺廣一尺厚七寸檢中刻三處深四寸方
五寸有蓋檢用金縷五周以水銀和金以為泥玉璽
一方寸二分一枚方五寸方石四角又有距石皆再
累枚長一丈厚一尺廣二尺皆在圓壇上其下用距
石十八枚皆高三尺厚一尺廣二尺如小碑環壇立
之去壇三步距石下皆有石跗入地四尺又用石碑
高九尺廣三尺五寸厚尺二寸立壇丙地去壇三丈
以上以刻書上以用石功難又欲及二月封故詔松

欲因故封石空檢更加封而已松上疏爭之以為登
封之禮告功皇天垂後無窮以為萬民也承天之敬
尤宜章明奉圖書之瑞尤宜顯著今因舊封竄寄玉
牒故石下恐非重命之義受命中興宜當特異以明
天意遂使泰山郡及魯趣石工宜取完青石無必五
色時以印工不能刻玉牒欲用丹漆書之會求得能
刻玉者遂書書秘刻方石中命容玉牒二月上至奉

高應劭漢官儀馬第伯封禪記曰車駕正月二十八日發雒陽宮二月九日到魯遣守謁者郭堅伯將

徒五百人治秦山道十日魯遣宗室諸劉及孔氏瑕
邱丁氏上壽受賜皆詣孔氏宅賜酒肉十一日發十
二日宿奉高是日遣虎賁郎將先上山三案行還益
治道徒千人十五日始齋國家居太守府舍諸王居
府中諸侯在縣庭中齋諸卿校尉將軍大夫黃門郎
百官及宋公衛公褒成侯東方諸侯雖中小侯齊城
外汶水上太尉太常齋山虞馬第伯自云某等七十
人先之山虞觀祭山壇及故明堂官郎官等郊肆處
入其幕府觀治石石二枚狀博平圓九尺此壇上石
也其一石武帝時石也時用五車不能上也因置山
下為屋號五車石四維距石長丈二廣二尺厚尺半
所四枚檢石長三尺廣六尺狀如封篋長檢十枚一
紀號石高大二尺廣三尺厚尺二寸名曰立石一枚
刻文字紀功德是朝上山騎行往往道峻峭不騎步
牽馬乍步乍騎且相半至中觀留馬去平地二十里
南向極望無不觀仰望天闕如從谷底仰觀抗峰其

為高也如視浮雲其峻也石壁窅窳如無道徑遙望
其人端如行朽兀或為白石或雪久之白者移過樹
乃知是人也殊不可上四布僵臥石上有頃復蘇亦
賴齋酒脯處處有泉水目輒為之明復勉強相將行
到天闌自以已至也問道中人言尚十餘里其道旁
山脅大者廣八九尺狹者五六尺仰視巖石松樹鬱
鬱蒼蒼若在雲中俯視谿谷碌碌不可見丈尺遂至
天門之下仰視天門變遼如從穴中視天直上七里
賴其羊腸逶迤名曰環道往往有絙索可得而登也
兩從者扶挾前人相牽後人見前人履底前人見後
人頂如畫重累人矣所謂磨胸搢石捫天之難也初
上此道行十餘步一休稍疲咽脣焦五六步一休牒
牒據頓地不避濕闇前有燥地目視而兩腳不隨早
食上脯後到天門郭使者得銅物銅物形狀如鐘又
方柄有孔莫能識疑封禪具也得之者汝南召陸人
姓楊名通東上一里餘得木甲木甲者武帝時神也

東北百餘步得封所始皇立石及闕在南方漢武在其北二十餘步得北垂圓臺高九尺方圓三丈所有兩陛人不得從上從東陛上臺上有壇方一丈二尺所有方石四維有距石四面有闕鄉壇再拜謁人多置錢物壇上亦不掃除國家上見之則詔書所謂酢梨酸棗狼籍散錢處數百幣帛具道是武帝封禪至泰山下未及上百官為先上跪拜置梨棗錢於道以求福即此也東山名曰日觀日觀者雞一鳴時見日始欲出長二丈所秦觀者望見長安吳觀者望見會稽周觀者望見齊西北有石室壇以南有玉盤中有玉龜山南脅神泉飲之極清美利人日入下去行數環日暮時頗雨不見其道一人居其前先知蹈有人乃舉足隨之比至遣侍御史與蘭臺令史將工先上天門下夜人定矣

山刻石文曰維建武三十有二年二月皇帝東巡狩

至於岱宗柴望秩於山川班於羣神遂覲東后從臣
太尉熹行司徒事特進高密侯禹等漢賓二王之後
在位孔子之後褒成侯序在東后蕃王十二咸來助
祭河圖赤伏符曰劉秀發兵捕不道四夷雲集龍鬬
野四七之際火為主河圖會昌符曰赤帝九世巡省
得中治平則封誠合帝道孔矩則天文靈出地祇瑞
興帝劉之九會命岱宗誠善用之姦偽不萌赤漢德
興九世會昌巡岱皆當天地扶九崇經之常漢大興

之道在九世之王封於泰山刻石著紀禪於梁父退
省考五河圖合古篇曰帝劉之秀九名之世帝行德
封刻政河圖提劉子曰九世之帝方明聖持衡拒九
州平天下子維書甄曜度曰赤三德昌九世會修符
合帝際勉封刻孝經鉤命決曰予誰行赤劉用帝三
建孝九會修專茲竭行封岱青河雒命后經識所傳
昔在帝堯聰明密微讓與舜庶後裔握機王莽以舅
后之家三司鼎足冢宰之權勢依託周公霍光輔幼

歸政之義遂以篡叛僭號自立宗廟隳壞社稷喪亡
不得血食十有八年揚徐青三州首亂兵革橫行延
及荊州豪傑并兼百里屯聚往往僭號北夷作寇千
里無煙無雞鳴犬吠之聲皇天睠顧皇帝以匹庶受
命中興年二十八載興兵起是以中次誅討十有餘
年罪人斯得黎庶得居爾田安爾宅書同文車同軌
人同倫舟輿所通人迹所至靡不貢職建明堂立辟
雍起靈臺設庠序同律度量衡修五禮五玉三帛二

牲一死贊吏各修職復於舊典在位三十有二年年
六十二乾乾日昃不敢荒寧涉危歷險親巡黎元恭
肅神祇惠恤耆老理庶遵古聽允明恕皇帝唯慎河
圖洛書正文是月辛卯柴登封泰山甲午禪於梁陰
以承靈瑞以為兆民永茲一字垂於後昆百僚從臣
郡守師尹咸蒙祉福永永無極

封禪儀曰車駕十九日之山虞國家居亭

百官布野比日山上雲氣成宮闕百官並見之二十
一日夕牲時白氣廣一丈東南極望致濃厚時天清
和無雲瑞命篇岱嶽
之瑞以日為應也

二十二日辛卯晨燎祭天於泰

山下南方羣神皆從用樂如南郊

封禪儀曰晨祭也日高二丈所燔燎

燔燎烟正北也

諸王王者後二公孔子後褒成君皆助祭位

事也

封禪儀曰百官各以次上郡儲輦三百為貴臣諸公王侯卿大夫百官皆步上少用輦輦者於

寶周禮注曰對舉曰輦

事畢將升封或曰泰山雖已從食於柴

祭今親升告功宜有禮祭於是使謁者以一特牲於

常祠泰山處告祠泰山如親耕耨劉先祠先農先虞

故事至食時御輦升山

封禪儀曰國家御首輦人輓升山至中觀休須臾復上

日中後到山上更衣

封禪儀曰須臾羣臣畢就位

早晡時即位於

壇北面羣臣以次陳後西上畢位升壇

封禪儀曰國家臺上北面

虎賁陞戰臺下

尚書令奉玉牒檢皇帝以寸二分璽親封之

訖太常命人發壇上石

封禪儀曰騶騎二千餘人發壇上方石

尚書令

藏玉牒已復石覆訖尚書令以五寸印封石檢

封禪儀曰

以金為繩以石三檢東方西方各三檢中石泥及壇土色赤白黑各依如其方色

事畢皇帝

再拜羣臣稱萬歲

封禪儀曰稱萬歲音動山谷有氣屬天遙望不見山巔山巔人在氣

中不命人立所刻石碑乃復道下

封禪儀曰封畢有頃詔百官以次下

國家隨後數百人維持行相逢推百官連延二十餘里道多迫小深谿高岸數百丈步從匍匐邪上起近

炬火止亦駱驛步從觸擊大石石聲正謹但謹石見
相應和者賜不能已口不能默夜半後到百官明日
乃訖其中老者氣劣不能行臥巖石下明日早太醫
令復遵問起居國家云昨上下山欲行迫前欲休則
後人所蹈道峻危險恐不能度國家不勞百官以下
露卧水飲無一人蹉跌無一人疾病豈非天耶泰山
率多暴雨如今上直下柴祭封登清晏溫 and 明日上
壽賜百官省事畢發幕宿奉高三十里明日發至
梁甫九十二十五日甲午禪祭地於梁陰以高后配
里夕牲

山川羣臣從如元始中北郊故事

封禪儀曰功效如彼天應如此羣臣

上壽國四月己卯大赦天下以建武三十二年為建
家不聽

武中元元年復博奉高禪勿出元年租芻橐以吉日

刻玉牒書函藏金匱璽印封之乙酉使太尉行事以特告至高廟太尉奉匱以告高廟藏於廟室西壁石

室高主室之下

袁宏曰夫天地者萬物之官府山川者雲雨之丘墟萬物生遂則官府之

功大雲雨施潤則丘墟之德厚故化洽天下則功配於天地澤流一國則德合於山川是以王者經畧必以天地為本諸侯述職必以山川為主體而象之取其陶育禮而告之歸其宗本書曰東巡狩至於岱宗柴傳曰郊祀后稷以祈農事夫巡狩觀化之常事祈農撫民之定業猶潔誠殷薦以告昊天況創制改物神人易聽者乎夫揖讓受終必有至德於天下征伐革命則有大功於萬物是故王者初基則有封禪之事蓋以其成功告於神明者也夫東方者萬物之所始山嶽者靈氣之所宅故求之物本必於其始取其

所通必於其宅崇其壇場則謂之封明其代興則謂之禪然則封禪者王者開務之大體也德不周洽不得輒議斯事功不弘濟不得髣髴斯禮曠代一有其道至高故自黃帝堯舜至三代各一得封禪未有中修其禮者也雖繼職之君時有功德此蓋率復舊業增修其前政不得仰齊造國同符改物者也夫神道貞一其用不煩天地易簡其禮尚質故藉用白茅貴其誠素器用陶匏取其易從然封禪之禮簡易可也若夫金匱玉牒非天地之性也唐書禮樂志文中子曰封禪非古也其秦漢之侈心乎蓋其曠世不舉行而於禮無所本故自漢以來學者議論不同而至於不能決則出於時君率意而行之爾宋馬端臨曰秦皇漢武之封禪也皆黜當時諸儒之議而自定其禮儀考史氏所載則秦之諸儒進蒲車掃地之說漢之諸儒有拘於詩書古文而不敢騁之說以此拂二帝之意而不見錄然封禪非古禮也切詳諸儒之

意蓋欲以古帝王巡狩望祀之禮而緣飾之然古帝王之事省方問俗賞善罰惡凡以為民其意出於公也秦漢二主之事則誇誦功德希求福壽凡以為己其意出於私也迹其舉措正自冰炭則又安能考詩書之說行簡質之禮乎固宜其見黜也

魏明帝黃初中護軍蔣濟奏曰夫帝王大禮巡狩為先昭祖揚禰封禪為首是以自古革命受符未有不蹈梁父登泰山刊無竟之名紀天人之際者也故司馬相如謂有文以來七十二君或順所繇於前謹遺教於後太史公曰主上有聖名而不宣布有司之過

也然則元公懿德不刊山梁之石無以顯帝王之功
示生民不朽之觀也今大魏振百王之弊亂極流遁
之艱危接千載之衰緒繼百世之廢業自武文至於
聖躬所以參成天地之道網維神人之化上天報應
嘉瑞顯祥以比往古其優衍豐隆無所取喻至於歷
世迄今未發大禮此儀久廢非倉卒可定宜下公卿
廣纂其禮卜年考時昭告上帝以副天下之望詔曰
聞蔣濟斯言使吾汗出流足自開闢以來封禪者七

十餘君爾故太史公曰雖有受命之君而功有不洽
是以中間曠遠者千有餘年近者數百載其儀闕不
可得祀吾何德之修敢庶茲乎濟豈以世無管仲以
吾有桓公登泰山之志乎吾不敢欺天也濟之所言
華則華矣非助我者也公卿侍中尚書常侍省之而
已勿復有所議亦不須荅詔也

時雖拒濟議實使高
堂隆草封禪儀以天

下未一不欲便行大
禮會隆卒不復行之

晉武帝太康元年三月壬申伐吳克之九月庚寅尚

書令衛瓘左僕射山濤等以天下一統奏請封禪曰
臣聞肇自生民則有帝辟載祀之數莫之能紀立德
濟世揮揚仁風以登封泰山者七十有四家其謚號
可知者十有四焉大晉之德始自重黎實佐顓頊至
於夏商世序天地其在於周不失其序金德將升世
濟明聖外平蜀漢海內歸心武功之盛實由文德至
於陛下受命踐祚弘建大業羣生仰毓維獨江湖沅
湘之表負固不賓神謀獨斷命將出討兵威震加數

旬盪定聲教所被達於四極若夫元石素文底號載
前象以姓表言以事告河圖洛書之徵不是過也宜
宣大典禮中嶽封泰山禪梁父發德號明至尊享天
休篤黎庶斯帝王之盛業天人之至望也詔曰今逋
寇雖殄外則障塞有警內則百姓未康此盛德之事
所未議也瓘等又曰臣等前奏蓋陳祖考之功天命
又應陛下之德合同四海述古考今宜循此禮至於
尅定須五府上議然後奏聞請下議詔曰雖蕩清江

表皆臨事者之勞何足以告成功望羣后思隆大化
以寧區夏百姓獲乂與之休息斯朕日夜之望無所
復下諸府矣勿復為煩瓘等再奏卒弗許

梁武帝天監八年時有請封禪者帝命草封禪儀欲
行之著作佐郎許懋建議曰舜柴岱宗是為巡狩而
鄭康成引孝經鉤命決云封於泰山考績燔燎禪於
梁父刻石紀號此緯書之曲說非正經之通議也如
管夷吾所說七十二君燧人之前世質民淳安得泥

金檢玉結繩而治安得鐫文告成妄亦甚矣若聖主
不須封禪若凡主不應封禪秦始皇嘗封泰山孫皓
嘗封國山皆由主好名於上而臣阿旨於下非盛德
之事不足為法也上嘉納之

時請封會稽禪
國山附採於此

北齊文宣帝天保五年正月制詔問升中紀號秀州
長史樊孝謙對曰臣問巡岳之禮勒在虞書省方之
義著於易象往帝前古匪維一姓封金刻玉億有餘
人仲尼之觀梁父不能盡識夷吾之對齊桓所存未

幾然盛德之事必待太平苟非其人更貽靈譴秦皇
無道致風雨之災漢武奢淫有奉車之害及文叔受
命炎精更輝四海安流天下輯睦劔賜騎士馬駕鼓
車乃用張純之文始從伯陽之說至於魏晉雖各有
君量德而處莫能擬議蔣濟上言於前徒穢紙墨袁
準發論於後終未施行世歷三朝年將十祀啟聖之
期茲為昌會然自水德不競函谷封塗天馬息歌苞
茅絕貢陛下以神武之資按此六軍未申九伐馬兒

不死子陽尚在便欲案明堂之圖草射牛之禮比德
論功多慙往列升中告禪臣用自疑

隋文帝開皇九年平陳朝野皆請封禪詔曰豈可命
一將軍除一小國遐邇注意便謂太平以薄德而封
名山用虛言而干上帝非朕攸聞今後言及封禪宜
即禁絕 十四年晉王廣帥百官抗表固請封禪帝
令牛弘等創定儀注既成帝視之曰茲事體大朕何
德以堪之但當東巡因致祭泰山耳

唐太宗貞觀六年羣臣請封禪不許初羣臣表請上曰卿輩皆以封禪為帝王盛事朕意不然若天下乂安家給人足雖不封禪庸何傷乎昔秦始皇封禪而漢文帝不封禪後世豈以文帝不及始皇耶且事天掃地而祭何必登泰山之巔封數尺之土然後可以展其誠敬乎羣臣請不已上亦欲從之惟魏徵獨以為不可曰帝王在德不在封禪上曰朕欲卿直言之勿有所隱朕功不高耶德未厚耶華夏未理耶遠夷

不慕義耶嘉瑞不至耶年穀不登耶對曰陛下功高
矣人未懷惠德厚矣澤未旁流華夏安矣未足以供
事遠夷慕矣無以供其求符瑞雖臻而罽羅猶密積
歲農稔而倉廩尚虛此臣所以竊為未可且陛下東
封萬國咸萃要荒之外莫不奔馳今自伊洛之東暨
乎海岱藿莽巨澤茫茫千里人烟斷絕雞犬不聞道
路蕭條進退艱阻寧可引彼戎狄示以虛弱竭財以
賞未厭遠人之望加年給復不償百姓之勞或遇水

旱之灾風雨之變庸夫邪議悔不可追豈獨臣之誠
懇亦有與人之論帝稱善乃止八年遣中書侍郎杜
正倫行泰山上七十二君壇迹以是歲兩河大水而
止其後羣臣言封禪者多十一年復命秘書少監顏
師古諫議大夫朱子奢等集當時名儒博士禱議不
能決於是左僕射房玄齡特進魏徵中書令楊師道
博採衆議奏上之其議曰為壇於泰山下祀昊天
上帝壇之廣十二丈高丈二尺玉牒長一尺三寸廣厚

五寸玉檢如之厚減三寸其印齒加璽纏以金繩五
周玉策四皆長一尺三寸廣寸五分厚五分每策皆
五簡聯以金昊天上帝配以太祖皇地祇配以高祖
已祀而歸格於廟盛以金匱匱高六寸廣足容之制
如表函纏以金繩封以金泥印以受命之璽而玉牒
藏於山上以方石三枚為再累纏以金繩封以石泥
印以受命之璽其山上之圜臺土以五色高九尺廣
五丈四面為一階天子升自南階而封玉牒已封而

加以土築為封高一丈二尺廣二丈其禪社首亦如之其石檢封以受命璽而玉檢別製璽方一寸二分文如受命璽以石距非經不用又為告至壇方八十一尺高三尺四出陛以燔柴告至望秩羣神遂著於禮其它降禪朝覲皆不著十五年四月辛卯詔以來歲二月有事於泰山六月己酉有星孛於太微丙辰停封泰山二十一年春詔以來年仲春有事於泰山秋八月詔停封禪

以薛延陀新降土功
屢興河北水灾故也

高宗顯慶四年夏六月詔許敬宗議封禪儀敬宗請以高祖太宗俱配上帝太穆文德二后並祀地祇從之麟德元年詔以三年正月封禪二年冬十月車駕發東都十二月至泰山時皇后表稱封禪祭皇地祇太后昭配而令公卿行事禮有未安請率內外命婦奠獻詔禪社首以皇后為亞獻越國太妃燕氏為終獻廢藁秸陶匏用茵褥壘爵文舞用功成慶善之樂武舞用神功破陳之樂乾封元年正月封於

泰山庚午禪於社首壬申大赦改元文武官階勲爵
民年八十以上版授下州刺史司馬縣令婦人郡縣
君七十以上至八十賜官爵一級民酺七日女子百
戶牛酒免所過今年租賦給復齊州一年半兗州二
年初議儀注封泰山為圜壇山南四里如圜丘三壇
壇上飾以青四方如其色號封祀壇玉策三以玉為
簡長一尺二寸廣一寸二分厚三分刻而金文玉匱
一長一尺三寸以藏上帝之冊金匱三以藏配帝之

冊纏以金繩五周金泥玉璽璽方一寸二分文如受命璽石碣以方石再累皆方五尺厚一尺刻方其中以容玉匱碣旁施檢刻深三寸三分闊一尺當繩刻深三分闊一寸五分石檢十枚以檢石碣皆長三尺闊一尺厚七分印齒三道皆深四寸當璽方五寸當繩闊一寸五分檢立於碣旁南方北方皆三東方西方皆二去碣隅皆一尺碣纏以金繩五周封以石泥距石十二分距碣隅皆再累皆闊二尺長一丈斜刻

其首令與礧隅相應又為壇於山上廣五丈高九尺
四出陛一墼號登封壇玉牒玉檢石礧石距玉墮石
檢皆如之為降禪壇於社首山上八隅一成八陛如
方丘三墼上飾以黃四方如其色其餘皆如登封其
議畧定而天子詔曰古今之制文質不同今封禪以
玉牒金繩而瓦尊匏爵結席宜改從文於是昊天
上帝禱以蒼地祗禱以黃配禱皆以紫而尊爵亦更焉
是歲正月天子祀昊天上帝於山下之封祀壇以高

祖太宗配如園丘之禮親封玉冊置石礧聚五色土
封之徑一丈二尺高尺已事升山明日又封玉冊於
登封禪壇又明日祀皇地祇於社首山之降禪壇如
方丘之禮以太穆皇后文德皇后配而以皇后武氏
為亞獻越國太妃燕氏為終獻又明日御朝觀壇以
朝羣臣如元日之禮乃詔立登封降禪朝觀之碑名
封祀壇曰舞鶴臺登封壇曰萬歲臺降禪壇曰景雲
臺以紀瑞焉

玉牒文

有唐嗣天子臣某敢昭告於昊天上帝有隋運屬顛
危數窮否塞生靈塗炭鼎祚淪亡高祖仗黃鉞而救
黎元賜玄圭而拯沈溺太宗功宏鍊石定區宇於再
麾業壯斷鰲飲滄海而一息臣奉餘緒恭承積慶遂
得崑山寢燎炎海澄波雖乃業茂宗祧斯實降靈寧
昊今謹告成東岳歸功上元大寶先隆鴻基永固凝
薰萬姓陶化八紘

附賂賓王為齊州父老請陪封禪文
圓天列象紫宮通北極之尊大帝凝圖元猷暢東巡
之禮是知光隆先澤既輯王於雲臺業紹禋宗必塗
金於日觀伏惟皇上乘乾握紀纂三統之重光御極
登樞應千靈之累聖故得河浮五老啓赤文於帝期
海薦四神奉丹書於王會瑞開三脊祥洽五雲既而
輯總章之舊文紹辟雍之故事非烟翼戟移玉輦於
梁陰若月重輪秘金繩於岱巖臣等質均芻狗陰謝
桑榆幸屬堯鏡多輝昭餘光於連石軒圖廣運追盛
禮於擬金然而鄒魯舊邦臨淄遺俗俱沐二周之化
咸稱一變之封境接青疇俯瞰獲麟之野山開翠岵
斜連辨馬之峰豈可使稷下遺氓頓隔陪封之禮淹
中故老獨奏告成之儀是用就日披丹仰壁輪而三
舍望雲紆素叫天闕於九重倘允徵誠許陪大禮則
夢瓊餘息詭仙間以相歡
就木殘魂遊岱宗而載躍

玄宗開元十二年冬十一月羣臣請封禪

時張說首建封禪之

議而源乾曜不欲為之由是與說不平

十三年冬十一月庚寅封於泰

山辛卯禪於社首壬辰大赦賜文武官階勲爵致仕

官一季祿公主嗣王都縣主一子官諸蕃酋長來會

者一官免所過一歲兗州二歲租賜天下酺七日先

是十二年時四方治定歲屢豐稔羣臣多言封禪中

書令張說又固請乃下制以十三年有事泰山於是

說與右散騎常侍徐堅太常少卿韋縚秘書少監康

子元國子博士侯行果刊立儀注立圜臺於山上廣五丈高九尺土色各依其方又於圜臺上起方壇廣一丈二尺高九尺其壇臺四面為一階又積柴為燎壇於圓臺之東南量地之宜柴高一丈二尺方一丈開上南出戶六尺又為圜壇於山下三成十二階如圜丘之制又積柴於壇南為燎壇如山上又為玉冊玉匱石礎皆如高宗之制玄宗初以謂升中於崇山精享也不可諠譁欲使亞獻以下皆行禮山下壇召

禮官講議學士賀知章等言是上帝君也五方精
帝臣也陛下享君於上羣臣祀臣於下可謂變禮之
中然禮成於三亞終之獻不可異也於是三獻皆升
山而五方帝及諸神皆祭山下壇玄宗問前世何為
秘玉牒知章曰玉牒以通意於天前代或祈長年布
神仙旨尚微密故外莫知帝曰朕今為民祈福無一
秘請即出玉牒以示百寮乃祀昊天上帝於山上壇
以高祖配祀五帝以下諸神於山下其祀禮皆如圜

丘而卜日告天及廟社大駕所經及告至問百年朝
覲皆如巡狩之禮其登山也為大次於中道止休三
刻而後升其已祭燔燎侍中前跪稱具官臣某言請
封玉冊皇帝升自南陛北向立太尉進昊天上帝神
坐前跪取玉冊置於案以進皇帝受玉冊跪內之玉
匱纏以金繩封以金泥侍中取受命寶跪以進皇帝
取寶以印玉匱侍中受寶以授符寶郎太尉進皇帝
跪捧玉匱授太尉太尉退復立太常卿前奏請再拜

皇帝再拜退入於次太尉奉玉匱之案於石礧南北
向立執事者發石蓋太尉奉玉匱跪藏於石礧內執
事者覆石蓋檢以石檢纏以金繩封以石泥以玉寶
徧印引降復位帥執事者以石距封固又以五色土
圜封其配座玉牒封於金匱皆如封玉匱太尉奉金
匱從降俱復位以金匱內太廟藏於高祖神堯皇帝
之石室其禪於社首皆如方丘之禮

玉牒文

有唐嗣天子臣某敢昭告於昊天上帝天啟李氏運
興土德高祖太宗受命立極高宗升中六合殷盛中
宗紹復繼體不定上帝眷祐錫臣忠武底綏內艱推
戴聖父恭承大寶十有三年敬恭天意四海宴然封
祀岱岳謝成於天子孫百祿蒼生受福

唐玄宗紀泰山序銘

勒石嶽頂世
號磨厓碑

朕宅帝位十有四載顧惟不德惜於至道任夫難任
安夫難安茲朕未知獲戾於上下心之浩蕩若涉於

大川賴上帝垂休先后儲慶宰衡庶尹交修皇極四海會同五典敷暢歲云再熟人用大和百辟僉謀倡予封禪謂孝莫大於嚴父謂禮莫尊於告天天符既至人望其積固請不已固辭不獲予與夫二三臣稽虞典繹漢制張皇六師震疊九寓旌旅有列士馬無譁肅肅邕邕翼翼溶溶以至於岱宗頂也爾雅云泰山為東嶽周官曰兗州之鎮山實惟天帝之孫羣靈之府其方處萬物之始故稱岱焉其位居五嶽之伯

故稱宗焉曰昔者受命易姓於是乎啟天地薦成功
序圖錄紀氏號朕承先王茲率厥典實欲報元天之
眷命為蒼生之祈福豈敢高視萬古自比九皇哉故
設壇塲於山下受羣方之助祭躬封燎於山上冀一
獻之通神斯亦因高崇天就廣增地之義也乃仲冬
庚寅有事東嶽類於昊天上帝配我高祖在天之神
罔不畢降粵翌日禪於社首侑我聖考祀於皇祇在
地之神罔不咸舉暨壬辰觀群后上公進曰天子膺

天符納介福羣臣拜手稽首稱千萬歲慶荅歡同陳
誠以德大運叶度彛倫攸敘三事百揆時乃之功萬
物由庚兆人允殖列牧衆宰時乃之功一二兄弟篤
以孝友錫類萬國時惟休哉我儒制禮我史作樂天
地擾順時惟休哉蠻夷戎狄重譯來貢累聖之化朕
何慕焉五靈百寶日來月集會昌之運朕何感焉凡
今而後儆乃在位一王度齊衆法摧舊章補缺政存
簡易去煩苛思立人極乃見天則於戲天生蒸人惟

后時又能以美利利天下事天明矣坤厚載物惟后
時相能以厚生生萬人事地察矣天地明察鬼神著
矣惟我藝祖文考精爽在天其曰懿予幼孫克享上
帝時若馨香其丕乃曰會我之文武曾孫其誕錫新
命續我舊業永保天祿子孫其承之予小子敢對揚
上帝之休命則亦與百執事尚綏兆人將多於前功
而必彼後患一夫不獲萬方其罪予一心有終上天
其知我朕惟實行三德曰慈儉讓慈者履無疆之吉

儉者崇將來之訓自滿者人損自謙者天益苟如此
則規迹易循基構易守磨石壁刻金記後之人聽詞
而見心觀末而知本銘曰惟天生人立君以理惟君
受命奉為天子代去不留人來無已德涼者滅道高
斯起赫赫高祖明明太宗爰革隋政奄有萬邦罄天
張宇盡地開封武稱有截文表時邕高宗稽古德施
周溥茫茫九夷削平一鼓禮備封禪功齊舜禹巖巖
岱宗衍我元神中宗紹運舊邦維新睿宗繼明天下

歸仁恭已南面網緼化醇告成之禮留諸後人緬予
小子重基五聖匪功伐高匪德矜盛欽若祀典丕承
永命至誠動天福我萬姓古封泰山七十二君或禪
社首或禪云云其迹不見其名可聞祇通文祖光昭
舊勲方士虛誕儒書齷齪佚后求仙誣神檢玉秦災
風雨漢汗編錄德未合天或承之辱道在觀政名非
從欲銘心絕巖播告羣岳

唐中書令張說序頌

皇唐六葉開元神武皇帝再受命致太平乃封岱宗
禪社首鑿石紀號天文煥發儒臣志美立碣祠壇曰
厥初生人俶有君臣其道茫昧其風朴略因時而歛
起與運而紛落泯泯沒沒無聞焉爾後代聖人取法
象立名位衣裳以等之甲兵以垣之於是禮樂出而
書記存矣反其源致敬乎天地報其本致美乎鬼神
則封禪者帝王受天命告成功之為也閱曩聖之興
訓考列辟之通術疇若天而不成曷背道而靡失由

此推之封禪之義有三帝王之略有七七者何傳不
云道德仁義禮智信乎順之稱聖哲逆之號狂悖三
者一位當五行圖籙之序二時會四海昇平之運三
德具欽明文思之美是謂與天合符名不死矣有一
不足而云封禪人且未許其如天何言舊史者君莫
道於陶唐虞舜臣莫德於臯陶稷禹三臣降德皆有
天下仲尼敘帝王之書繫周秦之誓明魯祀周公用
王禮秦承伯益接周統孔聖微旨不其效歟然秦定

天下之功高享天祿之日淺天而未忘庭堅之德也
故大命復集於皇家天之贊唐不惟舊哉其興之也
玄靈啟迪黃祗顧懷應歸運以義舉撫來蘇以利見
湯也無放夏之慙武也無伐殷之戰高祖創業四宗
重光德有格天漏泉蒸雲濡露菌蠢滋育氤氲涵煦
若天地之覆載日月之照臨溥有形而歸景罄無外
而宅心百有八年於茲矣皇帝攘內難而啟新命戴
睿宗而繼舊服宇宙更闢朝廷始位蓋羲軒氏之造

皇圖也九族敦序百姓昭明萬邦咸和黎人於變立
土圭以步歷革銅渾以正天蓋唐虞氏之張帝道也
天地四時六官著禮井田三壤五圻成賦廣九廟以
尊祖定六律以和神蓋三代之設王制也武緯之文
經之聖謩之神化之然猶戰戰兢兢日慎一日納規
誨以進德遂忠良以代工講習乎無為之書討論乎
集賢之殿寵勇爵貴經明翼乎鵷鷺之列在庭毅乎
貔豹之師居鄙人和旁感神寶沓至乾符坤珍千品

萬類超圖溢牒未始聞記我后以人瑞為心不以物
瑞為意王公卿士儼然進曰休哉陛下孝至於天政
合乎道前年祈后土人獲天穰間歲祀圜丘日不掩
朔感祥以祈聖因事以觀天天人交合其則不遠意
者喬丘掃路望翠華之來上帝儲恩俟蒼璧之禮久
矣焉可專讓而廢舊勛羣臣固言勤帝知罪至於再
至於三帝乃挹之曰欽崇天道俯率嘉話恐德不類
敢憚於勤其撰巡狩之儀求封禪之故既而禮官不

戒而備軍政不謀而輯天姥練日雨師灑道六甲按
隊八陣警蹕孟冬仲旬乘輿乃出千旗雲引萬戟林
行雁護燦爛飛焰揚精原野為之震動草木為之風
生歷郡縣省謠俗問百年舉百祀興墜典葺闕政攸
徂之人室家相慶萬方縱觀千里如堵城邑連歡丘
陵聚舞其中垂白之老樂過以泣不圖蒿里之魂復
見乾封之事堯雲往舜日還神華靈鬱爛熳乎穹壤
之間是月來至於岱祗被齋宮滌濯靜室凝神元覽

將款太一議夫泰山者聖帝受天官之宮天孫撫人
靈之府自昔立國莫知萬數克升中而建號惟七十
而有五我高宗六之而今七矣非夫尊位盛時明德
曠代遼闊難并之甚哉先時將臻夫大封也累封疆
於高岡築泰壇於陽趾夫其天壇三襲辰陞十二咸
秩衆靈列坐有次崇牙樹羽管磬鏞鼓宮懸於重壇
之內千戚鉞父鉤戟戣戣周位於四門之外代國重
器傳代絕瑞旅之於中庭玉輦金轂翠冒黃屋夾之

於端路庶官百辟羗夷蠻貊褒成之後讓王之客序
立於禮神之場髦頭弩牙鐵馬金鏃介冑如雪旗幟
如火遠匝於清禁之野於是乎以天正上元法駕徐
進屯千乘於平路留羣臣於谷口皇帝御六龍陟萬
仞獨與一二元老執事之人出天門臨日觀次沆瀣
宿曉巘赤霄可接白雲在下庚寅祀高祖於上封以
配上帝命衆官於下位以享衆神皇帝冕裘登壇奠
獻俯俛叶金奏修羽舞撞黃鍾歌大呂開閭闔與天

語清將信公奉斗布度懋建皇極勤恤蒼生昭嘏乎
未兆禳災乎未萌上下傳節而禮成樂徧福壽同歸
而帝賜神策乃檢玉牒於中頂揚柴燎於高天庶忠
誠之上達若憑炤而駕煙日轡方旋神心餘眷五
色雲起拂馬以隨人萬歲山呼從天而至地越翌日
尊睿宗侑地祇而禮社首遂張大樂觀東后國風惟
舊無黜幽削爵之誅王澤惟新有胥災大賚之慶不
浹日至化洽於人心不崇朝景福遍於天下然後藏

金匱於祐室迴玉鸞於上都煌煌乎真聖朝之能事而高代之盛節者也於斯之時華戎殊俗異音同歡曰兵合多雨山峻多雲豈有大舉百萬之師剋期千里之外及行事之日則天無點翳地無纖塵嚴冬變為韶景寒風鬱為和氣非至德其孰能動天如此其順者乎昔人云自西自東自南自北無思不服今信之聖人作而萬物覩其心服之之謂矣或曰祭泰祈主先后非禮歟曰是禮也非宜也王者父事天母事

地侑神崇孝無嫌可也且夫柴瘞外事帝王主之蒸
嘗內事后姤助之是開元正人倫革弊禮起百王之
法也故人千載睹末光聆絕韻咀甘實漱芳潤爍元
妙之至精流不已之淑聲臣說作頌告於神明四皇
墳而六帝典雖吉甫亦莫能名徒採彼輿人之詩曰
大矣哉維天為大惟皇則之率我萬國受天之祺子
孫百代人神共保綏之云爾而已矣

宋太宗太平興國八年六月兗州泰山父老及瑕邱

等七縣民詣闕請封禪上謙讓不允雍正元年夏四月泰山父老詣闕請封禪羣臣表請三上許之詔以十一月有事於泰山命翰林學士扈蒙等詳定儀注五月乾元文明二殿災詔求直言遂罷封禪

真宗大中祥符元年春正月乙丑有黃帛曳左承天門鳴尾上上召羣臣拜迎於朝元殿啟封號稱天書戊辰大赦改元三月甲戌兗州父老呂良等千二百八十七人及諸道貢舉之士八百四十六人詣闕陳

請東封而宰臣王旦等又率百官諸軍將校州縣官吏蕃夷僧道父老二萬四千三百七十人五上表請始詔今年十月有事於泰山遣官告天地宗廟社稷太一宮及在京祠廟嶽瀆命翰林太常禮院詳定儀注知樞密院王欽若叅知政事趙安仁為封禪經度制置使並判兗州三司使丁謂計度糧草引進使曹利用宣政使李神福修行宮道路皇城使劉承珪等計度發運詔禁緣路採捕及車騎蹂踐田稼以行宮

側官舍佛寺為百官宿頓之所調兗鄆兵克山下丁役行宮除前後殿外竝張幕為屋覆以油帊仍增自京至泰山驛馬令三司汴蔡御河入廣濟河運儀仗什物起兗州發上供木由黃河浮筏至鄆州給置頓費用省輦送之役以王旦為大禮使王欽若為禮儀使叅知政事馮拯為儀仗使知樞密院陳堯叟為鹵簿使趙安仁為橋道頓遞使仍鑄五使印及經度制置使印給之五月壬戌王欽若言泰山醴泉出六

月乙未天書再降於泰山醴泉北壬寅迎泰山天書
於食芳園九月遣使詣岳州采三脊茅三十束有老
人黃皓識之補州助教賜以束帛初太平興國中有
得唐玄宗社首玉冊蒼壁至是令瘞於舊所其前代
封禪壇址摧圯者命修完之山上置園臺徑五丈高
九尺四陞上飾以青四面如其方色一壝廣一丈圍
以青繩三周燎臺在其東南高丈二尺方一丈開上
南出戶方六尺山下封祀壇四成十二陞如圜丘制

上飾以青四面如其方色外為三壝燎壇如山上壇制社首壇八角三成每等高四尺上閭十六步八陞上等廣八尺中等廣一丈下等廣一丈二尺三壝四門如方丘制又為瘞瘞於土地外壝之內以玉為五牒牒各長尺二寸廣五寸厚一寸刻字而填以金聯以金繩絨以玉匱置石礮中

金滕難用以正坐配坐金塗繩代之

用玉冊六副每簡長一尺二寸廣一寸二分厚三分簡數量文多少匱長一尺三寸檢長如匱厚二寸闊

五寸纏金繩五周當纏繩處刻為五道而封以金泥
泥和金粉乳香為之印以受命寶封匱當寶處刻深二分用石

礮藏之其礮用石再累各方五尺厚一尺鑿中廣深
令容玉匱礮旁施檢處皆刻深七寸闊一尺南北各
三東西各二去隅皆七寸纏繩處皆刻三道廣一寸
五分深三分為石檢十以揪礮皆長三尺闊一尺厚
七寸刻三道廣深如纏繩其當封處刻深二寸取足
容寶皆有石蓋與封刻相應其檢立礮旁當刻處

又為金繩三以纏礧皆五周徑三分為石泥封礧

泥用

石末和方色土為之用金鑄寶曰天下同文如御前寶以封礧

際距石十二分距四隅皆闊二尺厚一尺長一丈斜

刻其道與礧隅相應皆再累為五色土圜封礧土徑

一丈二尺下徑三丈九尺命直史館劉鋹內侍張承

素領徒封圜臺石礧直集賢院宋臯內侍郝昭信封

社首石礧竝先往規度之詳定所言朝覲壇在行宮

南方九丈六尺高九尺四陞陞南面兩陞餘三面各

一陛一墮二分在南一分在北又按唐封禪備法駕
准故事乘輿出京竝用法駕所過州縣不備儀仗其
園臺上設登歌鐘磬各一具封祀壇宮架二十虞四
隅立建鼓二舞社首壇設登歌如園臺壇下宮架二
舞如封祀壇朝覲壇宮架二十虞不用熊羆十二案
又按大典南郊合祀天地服兗冕垂白珠十有二黹
衣纁裳十二章欲望封禪日依南郊例泊禮畢御朝
覲壇諸州所貢方物陳列如元正儀令尚書戶部告

示竝先集泰山下仍詔出京日具小駕儀仗太常寺
三百二十五人兵部五百六十六人殿中省九十一
人太僕寺二百九十九人六軍諸衛四百六十八人
左右金吾仗各一百七十六人司天監三十七人有
司言南郊惟昊天皇帝日月五方神州各用
幣內官而下別設六十六段分克按開寶通禮嶽鎮
海瀆幣從方色即日月皆有制幣今請封祀壇內官
至外官三百一十八位社首壇嶽鎮以下一十八位

竝用方色幣又南郊牲正坐配坐用犢五方帝日月
神州共用羊豕二十二從祀七百三十七位仍以前
數分克今請神州而上十二位用犢其舊供羊豕
改克從祀牲又景德中升天皇北極在第一等今
請亦於從祀牲內體薦舊制郊祀正坐配坐褥以
黃皇帝拜褥以緋至是詔配坐以緋拜褥以紫又
以靈山清潔命祀官差減其數或令兼攝有期喪
未滿餘服未卒哭者不得預祭內侍諸司官除掌

事宿衛外從升者裁二十四人諸司職掌九十三人其文武官升山者皆公服詳定所言漢書八神與歷代封禪帝皇及所禪山並於前祀七日遣官致祭以太牢祀泰山少牢祀社首九月詔審刑院開封府毋奏大辟案帝習儀於崇德殿初禮官言無帝王親習之文帝曰朕以達寅恭之意豈憚勞也既畢帝見禮文有未便諭宰臣與禮官再議於是詳定所言按開寶禮則燔燎畢封冊開元故事則封礧

後燔燎今如不對神封冊則未稱寅恭或封礧後送
神則併為誼瀆欲望俟終獻畢皇帝升壇封玉匱置
礧中泥印訖復位飲福送神樂止舉燎火次天書降
次金匱降禮儀使奏禮畢皇帝還大次俟封礧畢皇
帝再升壇省視緣祀禮已畢更不舉樂省訖降壇仍
詔山上亞獻終獻登歌作樂十月戊子朔禁天下屠
殺一月帝自告廟即屏葷蔬食自進發至行禮前竝
禁音樂有司請登封日園臺立黃麾仗至山下壇設

權火將行禮然炬相屬又出朱字漆牌遣執仗者傳付山下牌至公卿就位皇帝就望燎位山上傳呼萬歲下即舉燎皇帝還大次解嚴又傳呼而下祀官始退社首瘞坎亦設權火三為準遣司天設漏壺山之上下命中官覆校日景復於壇側擊板相應於太平頂天門黃峴嶺岱嶽觀各置長竿揭籠燈下照以相參候辛卯發京師以玉輅載天書先行次日如之至鄆州令從官衛士蔬食丁未次奉高宮戊申齋於穆

清殿諸升山者官給衣令祀日沐浴服之庚戌帝服
通天冠絳紗袍乘金輅備法駕至山門幄次改服鞞
袍乘步輦登山鹵簿儀衛列山下天書仗不上山與
法駕仗間立知制誥朱巽奉玉冊牒及圓臺行事官
先升且以回馬嶺至天門路峻絕人給橫板二長三
尺許繫綵兩端施於背膺選從卒推引而上衛士皆
給釘鞵供奉馬止於中路自山趾盤道至太平頂凡
兩步一人綵繡相間樹當道者不伐止縈以繒帝每

經陘險必降輦徒步亞獻寧王元偓終獻舒王元偁
鹵簿使陳堯叟從祀官點饌習儀於園臺是夕山下
罷警場辛亥設昊天上帝位於園臺奉天書於坐左
太祖太宗並配西北側向帝服兗冕升臺奠獻悉去
侍衛拂擢止於壝門籠燭前導亦徹之玉冊文曰嗣
天子臣某敢昭告於昊天上帝臣嗣膺景命昭事上
穹昔太祖揖讓開基太宗憂勤致治廓清寰宇混一
車書固抑升中以延積慶元符錫祚衆寶郊祥異域

咸懷豐年屢應虔修封祀祈福黎元謹以玉帛犧牲
粢盛庶品備茲禋燎式薦至誠皇伯考太祖皇帝皇
考太宗皇帝配神作主尚享玉牒文曰有宋嗣天子
臣某敢昭告於昊天上帝啟運大同惟宋受命太祖
肇基功成治定太宗膺圖重熙累盛粵惟冲人不承
列聖寅恭奉天憂勤聽政一紀於茲四隩來暨丕貺
殊尤元符章示儲慶發祥清淨可致時和年豐羣生
咸遂仰荷顧懷敢忘繼志僉議大封聿申昭事躬陟

喬嶽對越上天率禮祗肅備物吉蠲以仁守位以孝
奉先祈福逮下侑神昭德惠綏黎元懋建皇極天祿
無疆靈休允迪萬葉其昌永保純錫命羣官享五方
帝及諸神於山下封祀壇上飲福酒攝中書令王旦
跪稱曰天賜皇帝太一神策周而復始永綏兆人三
獻畢封金玉匱王旦奉玉匱置於石礧攝太尉馮拯
奉金匱以降將作監領徒封礧帝登園臺閱視訖還
御幄宰臣率從官稱賀山下傳呼萬歲聲動山谷即

日仗還奉高宮百官奉迎於谷口帝復齋於穆清殿
壬子禪祭皇地祇於社首山奉天書升壇以祖宗配
玉冊文曰嗣天子臣某敢昭告於皇地祇無私垂祐
有宋肇基命惟天啟慶賴坤儀太祖神武威震萬寓
太宗聖文德綏九土臣恭膺寶命纂承丕緒穹昊降
祥靈符下付景祚延鴻秘文昭著八表以寧五兵不
試九穀豐穰百姓親比方輿所資涼德是愧溥率同
詞縉紳協議因以時巡亦既肆類躬陳典禮祇事厚

載致孝祖宗潔誠嚴配以伸大報聿修明祀本支百
世黎元受祉謹以玉帛犧牲粢盛庶品備茲禋瘞式
薦至誠皇伯考太祖皇帝皇考太宗皇帝配神作主
尚享帝至山下服韡袍步出大次癸丑有司設仗衛
宮縣於壇下帝服袞冕御封禪壇上之壽昌殿受朝
賀大赦天下文武遞進官勲減免賦稅工役各有差
改封乾縣曰奉符縣宴百官卿監以上於穆清殿泰
山父老於殿門甲寅發奉符始進常膳帝之巡祭也

往還四十七日未嘗遇風雪嚴冬之候景氣恬和祥
應紛委前祀之夕陰霧風勁不可以燭及行事風頓
止天宇澄霽燭焰凝然封礮訖紫氣蒙壇黃光如帛
繞天書匣悉縱四方所獻珍鳥異獸山下法駕還奉
高宮日重輪五色雲現鼓吹振作觀者塞路歡呼動
天地改奉高宮曰會真宮九天司命上卿加號保生
天尊青帝加號廣生帝君天齊王加號仁聖各遣使
祭告詔王旦撰封祀壇頌王欽若撰社首壇頌陳堯

叟撰朝覲壇頌圜臺承祀官竝於山上刻名封祀九
宮社首壇奉祀官竝於社首頌碑陰刻名扈從升朝
官及內殿崇班軍校領刺史以上與蕃夷酋長竝於
朝覲頌碑陰刻名明年二月詔知兗州李迪東京轉
運使馬元方等同修圜封以呂良首請命攝兗州助
教

宋真宗御製序銘

即陰
字碑

朕聞一區宇而恢德教安品物而致昇平此邦家之

大業也考茂典而薦至誠登喬嶽而荅純錫此王者
之昭事也結繩已往茫茫而莫知方冊所存章章而
可辨罔不開先流福累洽儲休長發其祥永錫爾類
故能禋祀上帝肆覲羣后追八九之遐躅徇億兆之
歡心是以武王勦獨夫集大統而成王以之東巡高
帝平三猾啟天祿而武帝以之上封曩以五代陵夷
四方分裂嗷嗷九域顧影而求存顛顛萬民籲天而
仰訴不有神武多難何以戡不有文明至治何以復

恭惟太祖啟運立極英武聖文神德元功大孝皇帝
積善自始受命無疆歷試於艱難終陟於元后威靈
震疊元澤汪翔無往不賔有來斯應濟民於塗炭登
物於春臺俾乂萬邦成湯之甚盛咸宣九德文王之
有聲啟運於前垂裕於後太宗至仁應道神功聖德
文武大明廣孝皇帝洪基載紹景貺誕膺如日之升
燭於率土如天之廣覆於羣生人文化成神道設教
尊賢尚德下武後刑金石之音明靈是格玉帛之禮

蠻貊來同書軌畢臻典儀無闕上玄降鑒虞舜之溫
恭庶民不知唐堯之於變重熙之盛冠絕於古先增
高之文已頒乎成命逡巡其事謙莫大焉肆予沖人
獲守丕構其德不類其志不明弗克嗣興罔識攸濟
屬以陽春屆節靈文錫慶由是濟河耆老鄒魯諸生
啟予以神休邀予以封祀不遠千里來至闕庭朕惕
然而莫當彼確乎而莫止俄而王公藩牧卿士列校
獻封者五上伏閣者萬餘以為景命維新珍符紛委

不可辭者天意不可拒者羣心天意苟違何以謂之
順道羣心苟鬱何以謂之從人是宜登介丘成大禮
敦諭雖至勤請彌固切念乾坤垂祐宗社儲祉導揚
嘉氣僅洽小康俾夫疆場以寧干戈以息風雨以順
稼穡以登無震無驚既庶既富皆天之賜也豈朕之
功歟雖則告成功紀徽號非涼德之克堪也然而序
圖籙荅殊徵非眇躬之敢讓也天孫日觀梁甫仙間
五嶽之宗萬物之始升中燔燎舊章斯在繼繩先志

懿範遵已定之規祇事園壇嚴配肅因心之孝於是
詔輔臣以經置命羣儒而講習給祠祀者固有不至
供朕身者無必求豐故玉帛犧牲朕之所勤也羽儀
服御朕之所簡也精意篤志夙興夕惕誠明洞達顯
應還彰自天垂恩正真親臨於雲馭奉符行事子育
敢怠於政經粵以暮秋之初恭享清廟告以陟配孟
冬之吉虔登岱宗伸乎對越奉寶籙於座左升祖宗
以竝侑禮之正也孝之始也乃禪社首厥制咸若於

時天神畢降地祇畢登盼饗可期奠獻如覩其薦也
雖慙乎明德其感也實在乎至誠亦復酌鄴宮之前
聞遵甘泉之受計百辟委珮五等奉璋肆青施仁舉
善勸治稽考制度採摭風謠文物聲明所以揚二聖
之洪烈歡娛慶賜所以慰百姓之來思蓋又兩儀之
純嘏七廟之餘慶邦家之盛美蒸黎之介福豈予寡
昧所可致焉惟當寤寐寅威夙夜惕厲不自滿假不
自逸豫寵綏庶國茂育羣倫以荅穹昊之眷命焉勒

銘山阿用垂永世銘曰節彼岱嶽巋然東方庶物伊始元感其章自昔受命反始穹蒼燔柴於此七十六王顧惟寡薄恭嗣洪猷乾乾慄慄雖休勿休元符昭錫餘慶遐流羣情所迫盛則爰修前王丕顯是曰告成伊予冲眇無德而名永懷眷佑祇荅景靈聿崇嚴祀用達精誠殊祥疊委寓縣奔馳禮無違者神寶格思藏封石累刻字山嵎蒸民永泰繁祉常垂

徽宗政和四年充鄆濮開德興仁潁昌府鄭州廣濟

永興軍等上言父老欲詣闕請登封詔却之

時蔡京當國欲

講封禪以文太平預具金繩玉檢及凡儀物甚備然不果行

明成祖永樂中太常臣奏曰古者聖人治天下功德隆盛則必具封禪之禮以告於神明垂美於萬世今陛下繼統天清地寧民物咸遂聖德神功古無與讓而乃封禪未講何以繼前代帝王之盛請命禮部行之上曰封禪非古也帝王之有聞於後世者在德不在封禪不許

邱濬曰封禪之說詩書禮典畧不經見審有是事乃天下國家之盛舉堯舜禹

湯文武成康皆身致太平安得闕而弗講所謂七十
二君者果何代何人哉先儒有言養生至於長生不
死為國至於祈天永命皆有是理然人未有能為之
者縱為之然亦不出乎身心日用之間未必由乎服
食藥物微求鬼神而後致之也是故明君永年莫若
寡欲延國祚莫若愛民寡欲而至於全其天愛民而
至於過其虛誠有是理亦誠有是事嗚呼世主所以
甘心於不賞之費而行封禪之禮者以有秘祝之求
也誠知此理反之於心知其必無
驗之於古知其無效則自不為矣



山東通志卷十之二